

楚辭

(宋) 朱熹 楚辭集注欽定四庫全書 (依民國六十五年三民書局；傅錫王先生註譯，張孝裕先生注音版本校正)

卷一 離騷

卷二 九歌

東皇太一

雲中君

湘君

湘夫人

大司命

少司命

東君

河伯

山鬼

國殤

禮魂

卷三 天問

卷四 九章

惜誦

涉江

哀郢

抽思

懷沙

思美人

昔往日

橘頌

悲回風

卷五 遠遊

卷六 卜居

卷七 漁父

卷八 九辯

卷九 招覓

卷十 大招

卷十一 惜誓

卷十二 招隱士

卷十三 七諫

初放

沈江

怨世

怨思

自悲

哀命

謬諫

卷十四 哀時命

卷十五 九懷

匡機

卷十六

逢紛

離世

怨思

遠逝

惜賢

憂苦

愍命

思古

遠遊

卷十七

逢尤

怨上

疾世

憫上

通路

危俊

昭世

尊嘉

蓄英

思忠

陶壅

株昭

九歎

九思

遭厄 悼亂 傷時 哀歲 守志

## 卷一 離騷

帝高陽之苗裔兮，朕皇考曰伯庸。  
攝提貞於孟陬兮，惟庚寅吾以降。  
皇覽揆余于初度兮，肇錫余以嘉名；  
名余曰正則兮，字余曰靈均。  
紛吾既有此內美兮，又重之以脩能。  
扈江離與辟芷兮，紉秋蘭以為佩。  
汨余若將不及兮，恐年歲之不吾與。  
朝搴阰之木蘭兮，夕攬洲之宿莽。  
日月忽其不淹兮，春與秋其代序。  
惟草木之零落兮，恐美人之遲暮。  
不撫壯而棄穢兮，何不改乎此度？  
乘騏驥以馳騁兮，來吾道夫先路！  
昔三后之純粹兮，固衆芳之所在；  
雜申椒與菌桂兮，豈維紉夫蕙茝？  
彼堯舜之耿介兮，既遵道而得路；  
何桀紂之猖披兮，夫唯捷徑以窘步！  
惟夫黨人之偷樂兮，路幽昧以險隘；  
豈余身之憚殃兮，恐皇輿之敗績！  
忽奔走以先後兮，及前王之踵武；  
荃不察余之中情兮，反信讒而齎怒。  
余固知謇謇之為患兮，忍而不能舍也；  
指九天以為正兮，夫唯靈脩之故也！

曰黃昏以為期兮，羌中道而改路。  
初既與余成言兮，後悔遁而有他；  
余既不難夫離別兮，傷靈脩之數化。  
余既滋蘭之九畹兮，又樹蕙之百畝。  
畦留夷與揭車兮，雜杜衡與芳芷。  
冀枝葉之峻茂兮，願俟時乎吾將刈；  
雖萎絕其亦何傷兮，哀衆芳之蕪穢！  
衆皆競進以貪婪兮，憑不厭乎求索；  
羌內恕己以量人兮，各興心而嫉妒。  
忽馳騫以追逐兮，非余心之所急；  
老冉冉其將至兮，恐脩名之不立。  
朝飲木蘭之墜露兮，夕餐秋菊之落英。  
苟余情其信姱以練要兮，長顛頤亦何傷！  
擘木根以結茝兮，貫薜荔之落蕊；  
矯菌桂以紉蕙兮，索胡繩之纏纒。  
謇吾法夫前脩兮，非世俗之所服；  
雖不周於今之人兮，願依彭咸之遺則！  
長太息以掩涕兮，哀民生之多艱；  
余雖好脩姱以鞿羈兮，謇朝諝而夕替。  
既替余以蕙纒兮，又申之曰攬茝；  
亦余心之所善兮，雖九死其猶未悔！  
怨靈脩之浩蕩兮，終不察夫民心。  
衆女嫉余之蛾眉兮，謠諑謂余以善淫。

固時俗之工巧兮，徇規矩而改錯；  
背繩墨以追曲兮，競周容以為度。  
侘鬱邑余侘傺兮，吾獨窮困乎此時也；  
寧溘死以流亡兮，余不忍為此態也！  
驚鳥之不羣兮，自前世而固然；  
何方圜之能周兮，夫孰異道而相安？  
屈心而抑志兮，忍尤而攘詬；  
伏清白以死直兮，固前聖之所厚。  
悔相道之不察兮，延佇乎吾將反；  
回朕車以復路兮，及行迷之未遠。  
步余馬於蘭皋兮，馳椒丘且焉止息；  
進不入以離尤兮，退將復脩吾初服。  
製芰荷以為衣兮，集芙蓉以為裳；  
不吾知其亦已兮，苟余情其信芳！  
高余冠之岌岌兮，長余佩之陸離；  
芳與澤其雜糅兮，唯昭質其猶未虧。  
忽反顧以遊目兮，將往觀乎四荒；  
佩繽紛其繁飾兮，芳菲菲其彌章。  
民生各有所樂兮，余獨好脩以為常；  
雖體解吾猶未變兮，豈余心之可懲。  
女嬃之嬋媛兮，申申其詈予；  
曰：鯀婞直以亡身兮，終然歿乎羽之野。  
汝何博謗而好脩兮，紛獨有此姱節？

蕢蒞施以盈室兮，判獨離而不服。  
衆不可戶說兮，孰云察余之中情？  
世並舉而好朋兮，夫何斃獨而不予聽？  
依前聖以節中兮，喟憑心而歷茲；  
濟沅湘以南征兮，就重華而陳詞；  
啟《九辯》與《九歌》兮，夏康娛以自縱；  
不顧難以圖後兮，五子用失乎家巷。  
羿淫遊以佚畋兮，又好射夫封狐；  
固亂流其鮮終兮，泥又貪夫厥家。  
澆身被服強圉兮，縱欲而不忍；  
日康娛而自忘兮，厥首用夫顛隕。  
夏桀之常違兮，乃遂焉而逢殃；  
后辛之菹醢兮，殷宗用而不長。  
湯禹儼而祇敬兮，周論道而莫差。  
舉賢而授能兮，循繩墨而不頗。  
皇天無私阿兮，覽民德焉錯輔；  
夫維聖哲以茂行兮，苟得用此下土。  
瞻前而顧後兮，相觀民之計極；  
夫孰非義而可用兮，孰非善而可服？  
阽余身而危死兮，覽余初其猶未悔；  
不量鑿而正柄兮，固前脩以菹醢。  
曾歔歔余鬱邑兮，哀朕時之不當；  
攬茹蕙以掩涕兮，霑余襟之浪浪。



跪敷衽以陳辭兮，耿吾既得此中正；  
馳玉虬以乘鸞兮，溘埃風余上征。  
朝發軔於蒼梧兮，夕余至乎縣圃；  
欲少留此靈瑣兮，日忽忽其將暮。  
吾令羲和弭節兮，望崦嵫而勿迫；  
路曼曼其脩遠兮，吾將上下而求索。  
飲余馬於咸池兮，總余轡乎扶桑；  
折若木以拂日兮，聊逍遙以相羊。  
前望舒使先驅兮，後飛廉使奔屬；  
鸞皇為余先戒兮，雷師告余以未具。  
吾令鳳鳥飛騰兮，繼之以日夜；  
飄風屯其相離兮，帥雲霓而來御。  
紛總總其離合兮，斑陸離其上下；  
吾令帝閭開關兮，倚閭闔而望予。  
時曖曖其將罷兮，結幽蘭而延佇；  
世溷濁而不分兮，好蔽美而嫉妒。  
朝吾將濟於白水兮，登閭風而緜馬；  
忽反顧以流涕兮，哀高丘之無女。  
溘吾遊此春宮兮，折瓊枝以繼佩；  
及榮華之未落兮，相下女之可詒。  
吾令豐隆乘雲兮，求宓妃之所在；  
解佩纒以結言兮，吾令蹇脩以為理。  
紛總總其離合兮，忽緯繡其難遷；

夕歸次於窮石兮，朝濯髮乎洧盤。  
保厥美以驕傲兮，日康娛以淫遊；  
雖信美而無禮兮，來違棄而改求。  
覽相觀於四極兮，周流乎天余乃下；  
望瑤臺之偃蹇兮，見有娥之佚女。  
吾令鳩為媒兮，鳩告余以不好；  
雄鳩之鳴逝兮，余猶惡其佻巧。  
心猶豫而狐疑兮，欲自適而不可；  
鳳皇既受詒兮，恐高辛之先我。  
欲遠集而無所止兮，聊浮遊以逍遙；  
及少康之未家兮，留有虞之二姚。  
理弱而媒拙兮，恐導言之不固；  
世溷濁而嫉賢兮，好蔽美而稱惡。  
閨中既以邃遠兮，哲王又不寤；  
懷朕情而不發兮，余焉能忍與此終古。  
索蘆茅以筮筮兮，命靈氛為余占之。  
曰：「兩美其必合兮，孰信脩而慕之？」  
思九州之博大兮，豈唯是其有女？」  
曰：「勉遠逝而無狐疑兮，孰求美而釋女？  
何所獨無芳草兮，爾何懷乎故宇？  
世幽昧以眩曜兮，孰云察余之善惡？  
民好惡其不同兮，惟此黨人其獨異；  
戶服艾以盈要兮，謂幽蘭其不可佩。

覽察草木其猶未得兮，豈理美之能當？  
蘇糞壤已充幃兮，謂申椒其不芳！  
欲從靈氛之吉占兮，心猶豫而狐疑；  
巫咸將夕降兮，懷椒糈而要之。  
百神翳其備降兮，九疑繽其並迎；  
皇剡剡其揚靈兮，告余以吉故。  
曰：「勉陞降以上下兮，求筮雉之所同；  
湯禹嚴而求合兮，摯咎繇而能調。  
苟中情其好脩兮，又何必用夫行媒；  
說操築於傳巖兮，武丁用而不疑。  
呂望之鼓刀兮，遭周文而得舉；  
甯戚之謳歌兮，齊桓聞以該輔。  
及年歲之未宴兮，時亦猶其未央；  
恐鵠馱之先鳴兮，使夫百草為之不芳。  
何瓊佩之偃蹇兮，衆薜然而蔽之；  
惟此黨人之不諒兮，恐嫉妒而折之。  
時繽紛其變易兮，又何以淹留？  
蘭芷變而不芳兮，荃蕙化而為茅。  
何昔日之芳草兮，今直為此蕭艾也？  
豈其有他故兮，莫好脩之害也！  
余以蘭為可恃兮，羌無實而容長；  
委厥美以從俗兮，苟得列乎衆芳。  
椒專佞以慢愞兮，楫又欲充夫佩幃；

既干進而務入兮，又何芳之能祇！  
固時俗之流從兮，又孰能無變化？  
覽椒蘭其若茲兮，又況揭車與江離？  
惟茲佩之可貴兮，委厥美而歷茲；  
芳菲菲而難虧兮，芬至今猶未沫。  
和調度以自娛兮，聊浮游而求女；  
及余飾之方壯兮，周流觀乎上下。  
靈氛既告余以吉占兮，歷吉日乎吾將行。  
折瓊枝以為羞兮，精瓊靡以為粦。  
為余駕飛龍兮，雜瑤象以為車；  
何離心之可同兮，吾將遠逝以自疏！  
遭吾道夫崑崙兮，路脩遠以周流；  
揚雲霓之晻藹兮，鳴玉鸞之啾啾。  
朝發軔於天津兮，夕余至乎西極；  
鳳皇翼其承旂兮，高翱翔之翼翼。  
忽吾行此流沙兮，遵赤水而容與；  
麾蛟龍使梁津兮，詔西皇使涉予。  
路脩遠以多艱兮，騰衆車使徑待；  
路不周以左轉兮，指西海以為期。  
屯余車其千乘兮，齊玉軛而並馳；  
駕八龍之婉婉兮，載雲旗之委蛇。  
抑志而弭節兮，神高馳之邈邈；  
奏九歌而舞韶兮，聊假日以愉樂。

陟陛皇之赫戲兮，忽臨睨夫舊鄉；  
僕夫悲余馬懷兮，蜷局顧而不行。

亂曰：已矣哉！

國無人莫我知兮，又何懷乎故都？  
既莫足與為美政兮，吾將從彭咸之所居。

## 卷二 九歌

### 東皇太一

吉日兮辰良，穆將愉兮上皇。  
撫長劍兮玉珥，璆鏘鳴兮琳琅。  
瑤席兮玉瑱，盍將把兮瓊芳。  
蕙飭蒸兮蘭藉，奠桂酒兮椒漿。  
揚枹兮拊鼓，●●●兮●●●  
疏緩節兮安歌，陳竽瑟兮浩倡。  
靈偃蹇兮姣服，芳菲菲兮滿堂。  
五音紛兮繁會，君欣欣兮樂康。

### 雲中君

浴蘭湯兮沐芳，華采衣兮若英。  
靈連蜷兮既留，爛昭昭兮未央。  
蹇將憺兮壽宮，與日月兮齊光。  
龍駕兮帝服，聊翱遊兮周章。  
靈皇皇兮既降，猋遠舉兮雲中。  
覽冀州兮有餘，橫四海兮焉窮。  
思夫君兮太息，極勞心兮憊憊。

### 湘君

君不行兮夷猶，蹇誰留兮中洲？

美要眇兮宜修，沛吾乘兮桂舟。  
令沅湘兮無波，使江水兮安流！  
望夫君兮未來，吹參差兮誰思？  
駕飛龍兮北徵，邇吾道兮洞庭。  
薜荔柏兮蕙綢，蓀橈兮蘭旌。  
望涔陽兮極浦，橫大江兮揚靈。  
揚靈兮未極，女嬋媛兮為余太息。  
橫流涕兮潺湲，隱思君兮惝側。  
桂權兮蘭枻，斲冰兮積雪。  
採薜荔兮水中，搴芙蓉兮木末。  
心不同兮媒勞，恩不甚兮輕絕。  
石瀨兮淺淺，飛龍兮翩翩。  
交不忠兮怨長，期不信兮告余以不閒。  
鼉騁驚兮江臯，夕弭節兮北渚。  
鳥次兮屋上，水周兮堂下。  
捐余玦兮江中，遺余佩兮醴浦。  
采芳洲兮杜若，將以遺兮下女。  
豈不可兮再得，聊逍遙兮容與。

### 湘夫人

帝子降兮北渚，目眇眇兮愁予。  
嫋嫋兮秋風，洞庭波兮木葉下。  
白蘋兮騁望，與佳期兮夕張。

鳥萃兮蘋中，罾何為兮木上。

沅有芷兮醴有蘭，思公子兮未敢言。

荒忽兮遠望，觀流水兮潺湲。

麋何食兮庭中？蛟何為兮水裔？

朝馳余馬兮江皋，夕濟兮西澨。

聞佳人兮召予，將騰駕兮偕逝。

築室兮水中，葺之兮荷蓋。

蓀壁兮紫壇，播芳椒兮成堂。

桂棟兮蘭橈，辛夷楣兮葑房。

罔薜荔兮為帷，擗蕙櫨兮既張。

白玉兮為鎮，疏石蘭兮為芳。

芷葺兮荷屋，燎之兮杜衡。

合百草兮實庭，建芳馨兮廡門。

九嶷繽兮並迎，靈之來兮如雲。

捐余袂兮江中，遺余襟兮醴浦。

搴汀洲兮杜若，將已遺兮遠者。

時不可兮驟得，聊逍遙兮容與。

## 大司命

廣開兮天門，紛吾乘兮玄雲。

令飄風兮先驅，使凍雨兮灑塵。

君迴翔兮已下，踰空桑兮從女。

紛總總兮九州，何壽夭兮在予！



高飛兮安翔，乘清氣兮御陰陽。  
吾與君兮齋速，導帝之兮九坑。  
靈衣兮被被，玉佩兮陸離。  
壹陰兮壹陽，衆莫知兮余所為。  
折疏麻兮瑤華，將以遺兮離居。  
老冉冉兮既極，不寢近兮愈疏。  
乘龍兮鱗鱗，高駝兮冲天。  
結桂枝兮延竚，羌愈思兮愁人。  
愁人兮柰何，願若今兮無虧。  
固人命兮有當，孰離合兮可為？

### 少司命

秋蘭兮麝蕪，羅生兮堂下。  
綠葉兮素枝，芳菲菲兮襲予。  
夫人自有兮美子，蓀何已兮愁苦！  
秋蘭兮青青，綠葉兮紫莖。  
滿堂兮美人，忽獨與余兮日成。  
入不言兮出不辭，乘回風兮載雲旗。  
悲莫悲兮生別離，樂莫樂兮新相知。  
荷衣兮蕙帶，儵而來兮忽而逝。  
夕宿兮帝郊，君誰須兮雲之際？  
與女遊兮九河，衝風至兮水揚波。  
與女沐兮咸池，晞女髮兮陽之阿。

望美人兮未來，臨風怳兮浩歌。  
孔蓋兮翠旂，登九天兮撫彗星。  
竦長劍兮擁幼艾，蓀獨宜兮為民正。

### 東君

暎將出兮東方，照吾檻兮扶桑。  
撫余馬兮安驅，夜皎皎兮既明。  
駕龍輶兮乘雷，載雲旗兮委蛇。  
長太息兮將上，心低徊兮顧懷。  
羌聲色兮娛人，觀者憺兮忘歸。  
緬瑟兮交鼓，簫鍾兮瑤篴，  
鳴篴兮吹竽，思靈保兮賢媿。  
翻飛兮翠曾，展詩兮會舞。  
應律兮合節，靈之來兮蔽日。  
青雲衣兮白霓裳，舉長矢兮射天狼。  
操余弧兮反淪降，援北斗兮酌桂漿。  
撰余轡兮高駝翔，杳冥冥兮以東行。

### 河伯

與女遊兮九河，衝風起兮橫波。  
乘水車兮荷蓋，駕兩龍兮驂螭。  
登崑崙兮四望，心飛揚兮浩蕩。  
日將暮兮悵忘歸，惟極浦兮寤懷。

魚鱗屋兮龍堂，紫貝闕兮朱宮。  
靈何為兮水中，乘白龜兮逐文魚。  
與女遊兮河之渚，流澌紛兮將來下。  
子交手兮東行，送美人兮南浦。  
波滔滔兮來迎，魚鱗鱗兮媵予。

### 山鬼

若有人兮山之阿，被薜荔兮帶女羅。  
既含睇兮又宜笑，子慕予兮善窈窕。  
乘赤豹兮從文狸，辛夷車兮結桂旗。  
被石蘭兮帶杜衡，折芳馨兮遺所思：  
「余處幽篁兮終不見天，路險難兮獨後來。」  
表獨立兮山之上，雲容容兮而在下。  
杳冥冥兮羌晝晦，東風飄兮神靈雨。  
留靈脩兮憺亡歸，歲既晏兮孰華予。  
采三秀兮於山間，石磊磊兮葛蔓蔓。  
怨公子兮悵忘歸，君思我兮不得閒。  
山中人兮芳杜若，飲石泉兮蔭松柏。  
君思我兮然疑作。靄填填兮雨冥冥，猿啾啾兮又夜鳴。  
風颯颯兮木蕭蕭，思公子兮徒離憂。

### 國殤

操吳戈兮被犀甲，車錯轂兮短兵接。

旌蔽日兮敵若雲，矢交墜兮士爭先。  
凌余陣兮躡余行，左驂殪兮右刃傷。  
霾兩輪兮繫四馬，援玉枹兮擊鳴鼓。  
天時墜兮威靈怒，嚴殺盡兮棄原壑。  
出不入兮往不反，平原忽兮路超遠。  
帶長劍兮挾秦弓，首身離兮心不懲。  
誠既勇兮又以武，終剛強兮不可凌。  
身既死兮神以靈，子魂魄兮為鬼雄。

### 禮魂

成禮兮會鼓，傳芭兮代舞，  
●●兮●●●媠女倡兮容與。  
春蘭兮秋菊，長無絕兮終古。

## 卷三 天問

曰：遂古之初，誰傳道之？  
上下未形，何由考之？  
冥昭瞢暗，誰能極之？  
馮翼惟像，何以識之？  
明明闇闇，惟時何為？  
陰陽三合，何本何化？  
圜則九重，孰營度之？  
惟茲何功，孰初作之？  
斡維焉繫，天極焉加？  
八柱何當，東南何虧？  
九天之際，安放安屬？  
隅隈多有，誰知其數？  
天何所沓，十二焉分？  
日月安屬，列星安陳？  
出於湯谷，次於蒙汜？  
自明及晦，所行幾里？  
夜光所德，死則又育？  
厥利維何，而顧菟在腹？  
女岐無合，夫焉取九子？  
伯強何處？惠氣安在？  
何闔而晦？何開而明？

角宿未旦，曜靈安藏？  
不任汨鴻，師何已尚之？  
僉曰：「何憂何不課而行之？」  
鳴龜曳銜，鯀何聽焉？  
順欲成功，帝何刑焉？  
永遏在羽山，夫何三年不施？  
伯禹復鯀，夫何已變化？  
纂就前緒，遂成考功。  
何續初繼業，而厥謀不同？  
洪泉極深，何以竄之？  
地方九則，何以墳之？  
河海應龍，何盡何歷？  
鯀何所營？禹何所成？  
康回馮怒，墜何故以東南傾？  
九州安錯？川谷何洿？  
東流不溢，孰知其故？  
東西南北，其修孰多？  
南北順墮，其衍幾何？  
昆侖縣圃，其尻安在？  
增城九重，其高幾里？  
四方之門，其誰從焉？  
西北辟啟，何氣通焉？  
日安不到，燭龍何照？

羲和之未揚，若華何光？  
何所冬暖？何所夏寒？  
焉有石林，何獸能言？  
焉有虬龍，負熊以游？  
雄虺九首，儻忽焉在？  
何所不死？長人何守？  
靡萍九衢，臬華安居？  
一蛇吞象，厥大何如？  
黑水玄趾，三危安在？  
延年不死，壽何所止？  
鯪魚何所？魼堆焉處？  
羿焉彈日？烏焉解羽？  
禹之力獻功，降省下土四方。  
焉得彼蠢山女，而通之於臺桑？  
閔妃匹合，厥身是繼。  
胡維嗜不同味，而快鼃飽？  
啟代益作后，卒然離蠶。  
何啟惟憂，而能拘是達？  
皆歸歟鞠，而無害厥躬。  
何后益作革，而禹播降？  
啟棘賓商，九辨九歌。  
何勤子屠母，而死分竟地？  
帝降夷羿，革孽夏民。

胡歟夫河伯，而妻彼雒嬪？  
馮珧利決，封豨是歟。  
何獻蒸肉之膏，而后帝不若？  
泥娶純狐，眩妻爰謀。  
何羿之歟革，而交吞揆之？  
阻窮西征，巖何越焉？  
咸播秬黍，莆蕝是營。  
何由並投，而鯨疾修盈？  
白蜺嬰茀，胡為此堂？  
安得夫良藥，不能固藏？  
天式從橫，陽離爰死。  
大鳥何鳴？夫焉喪厥體？  
萍號起雨，何以興之？  
撰體協脅，鹿何膺之？  
鰲戴山抃，何以安之？  
釋舟陵行，何以遷之？  
惟澆在戶，何求於嫂？  
何少康逐犬，而顛隕厥首？  
女歧縫裳，而館同爰止。  
何顛易厥首，而親以逢殆？  
湯謀易旅，何以厚之？  
覆舟斟尋，何道取之？  
桀伐蒙山，何所得焉？



妹嬉何肆，湯何殛焉？  
舜閔在家，父何以鰥？  
堯不姚告，二女何親？  
厥萌在初，何所億焉？  
璜臺十成，誰所極焉？  
登立為帝，孰道尚之？  
女媧有體，孰制匠之？  
舜服厥弟，終然為害。  
何肆犬體，而厥身不危敗？  
吳獲迄古，南嶽是止。  
孰期去斯，得兩男子？  
緣鵠飾玉，后帝是饗。  
何乘謀夏桀，終以滅喪？  
帝乃降觀，下逢伊摯。  
何條放致罰，而黎服大說？  
簡狄在臺，譽何宜？  
玄鳥致貽，女何喜？  
該秉季德，厥父是臧。  
胡終弊於有扈，牧夫牛羊？  
干協時舞，何以懷之？  
平脅曼膚，何以肥之？  
有扈牧豎，云何而逢？  
擊床先出，其命何從？

恆秉季德，焉得夫朴牛？  
何往營班祿，不但還來？  
昏微遵跡，有狄不寧。  
何繁鳥萃棘，負子肆情？  
眩弟竝淫，危害厥兄。  
何變化以作詐，後嗣而逢長？  
成湯東巡，有莘爰極。  
何乞彼小臣，而吉妃是得？  
水濱之木，得彼小子。  
夫何惡之，媵有莘之婦？  
湯出重泉，夫何臯尤？  
不勝心伐帝，夫誰使挑之？  
會鼃爭盟，何踐吾期？  
蒼鳥群飛，孰使萃之？  
到擊紂躬，叔且不嘉。  
何親揆發，足周之命以咨嗟？  
授殷天下，其位安施？  
反成乃亡，其罪伊何？  
爭遣伐器，何以行之？  
竝驅擊翼，何以將之？  
昭后成遊，南土爰底。  
厥利惟何，逢彼白雉？  
穆王巧梅，夫何為周流？

環理天下，夫何索求？  
妖夫曳銜，何號於市？  
周幽誰誅？焉得夫褒姒？  
天命反側，何罰何佑？  
齊桓九會，卒然身殺。  
彼王紂之躬，孰使亂惑？  
何惡輔弼，讒諂是服？  
比干何逆，而抑沈之？  
雷開何順，而賜封之？  
何聖人之一德，卒其異方？  
梅伯受醢，箕子佯狂。  
稷維元子，帝何竺之？  
投之於冰上，鳥何燠之？  
何馮弓挾矢，殊能將之？  
既驚帝切激，何逢長之？  
伯昌號衰，秉鞭作牧。  
何令徹彼岐社，命有殷國？  
遷藏就岐，何能依？  
殷有惑婦，何所譏？  
受賜茲醢，西伯上告。  
何親就上帝，罰殷之命以不救？  
師望在肆，昌何識？  
鼓刀揚聲，后何喜？

武發殺殷，何所悒？  
載尸集，何所急？  
伯林雉經，惟其何故？  
何感天抑墜，夫誰畏懼？  
皇天集命，惟何戒之？  
受禮天下，又使至代之。  
初湯臣摯，後茲承輔。  
何卒官湯，尊食宗緒？  
勳闔夢生，少離散亡。  
何壯武厲，能流厥嚴？  
彭鏗斟雉，帝何饗？  
受壽永多，夫何長久？  
中央共牧，后何怒？  
蜂蛾微命，力何固？  
驚女采薇，鹿何祐？  
北至回水，萃何喜？  
兄有噬犬，弟何欲？  
易之以百兩，卒無祿。  
薄暮雷電，歸何憂？  
厥嚴不奉，帝何求？  
伏匿穴處，爰何云？  
荆勳作師，夫何長？  
悟過改更，我又何言？

吳光爭國，久余是勝。

何環穿自閩社、丘陵，爰出子文？

吾告堵敖以不長，何試上自予，忠名彌彰？

## 卷四 九章

### 借誦

借誦以致愍兮，發憤以抒情，所作忠而言之兮，指蒼天以為正。

令五帝以枿中兮，戒六神與嚮服；俾山川以備御兮，命咎繇使聽直。

竭忠誠以事君兮，反離群而贅疣。

忘儂媚以背眾兮，待明君其知之。

言與行其可迹兮，情與貌其不變。

故相臣莫若君兮，所以證之不遠。

吾誼先君而後身兮，羌眾人之所仇。

專惟君而無他兮，又眾兆之所讎。

壹心而不豫兮，羌不可保也。

疾親君而無他兮，有招禍之道也。

思君其莫我忠兮，忽亡身之賤貧。

事君而不貳兮，迷不知寵之門。

忠何罪以遇罰兮，亦非余心之所志。

行不羣以巔越兮，又眾兆之所哈。

紛逢尤以離謗兮，謬不可釋。

情沈抑而不達兮，又蔽而莫之白。

心鬱邑余侘傺兮，又莫察余之中情。

固煩言不可結詒兮，願陳志而無路。

退靜默而莫余知兮，進號呼又莫吾聞。

申侘傺之煩惑兮，中悶瞀之忡忡。

昔余夢登天兮，魂中道而無杭。

吾使厲神占之兮，曰：「有志極而無旁。」

終危獨以離異兮，曰：「君可思而不可恃。」

故眾口其鑠金兮，初若是而逢殆。

懲於羹者而吹壺兮，何不變此志也？

欲釋階而登天兮，猶有曩之態也！

眾駭遽以離心兮，又何以為此伴也？

同極而異路兮，又何以為此援也！

晉申生之孝子兮，父信讒而不好。

行婞直而不豫兮，鯀功用而不就。」

吾聞作忠以造怨兮，忽謂之過言，九折臂而成醫兮，吾至今而知其信然！

贈弋機而在上兮，尉羅張而在下。設張辟以娛君兮，願側身而無所。

欲僵回以千僚兮，恐重患而離尤。

欲高飛而遠集兮，君罔謂：「汝何之？」

欲橫奔而失路兮，堅志而不忍。

背膺牂以交痛兮，心鬱結而紆軫。

檇木蘭以矯蕙兮，鑿申椒以為糧。

播江離與滋菊兮，願春日以為糗芳。

恐情質之不信兮，故重著以自明。

矯茲媚以私處兮，願曾思而遠身。

## 涉江

余幼好此奇服兮，年既老而不衰。

帶長鈇之陸離兮，冠切雲之崔嵬。  
被明月兮珮寶璐。

世溷濁而莫余知兮，吾方高馳而不顧。

駕青虬兮驂白螭，吾與重華遊兮瑤之圃。

登崑崙兮食玉英，與天地兮同壽，與日月兮同光。

哀南夷之莫吾知兮，且余濟乎江湘。

乘鄂渚而反顧兮，歛秋冬之緒風。

步余馬兮山臯，邸余車兮方林。

乘舲船余上沅兮，齊吳榜以擊汰。

船容與而不進兮，淹回水而疑滯。

朝發枉渚兮，夕宿辰陽。

苟余心其端直兮，雖僻遠之何傷。

入澗浦余儻徊兮，迷不知吾所如。

深林杳以冥冥兮，猿狖之所居。

山峻高已蔽日兮，下幽晦已多雨。

霰雪紛其無垠兮，雲霧霏而承宇。

哀吾生之無樂兮，幽獨處乎山中。

吾不能變心而從俗兮，固將愁苦而終窮。

接輿髡首兮，桑扈贏行。

忠不必用兮，賢不必已。

伍子逢殃兮，比干菹醢。

與前世而皆然兮，吾又何怨乎今之人！

余將董道而不豫兮，固將重昏而終身！



亂曰：

鸞鳥鳳皇日以遠兮，燕雀烏鵲巢堂壇兮，露申辛夷死林薄兮，腥臊並御芳不得薄兮，陰陽易位時不當兮，信侘傺忽乎吾將行兮。

### 哀郢

皇天之不純命兮，何百姓之震愆？  
民離散而相失兮，方仲春而東遷。  
去故鄉而就遠兮，遵江夏以流亡。  
出國門而軫懷兮，甲之鼃吾以行。  
發郢都而去閭兮，荒忽其焉極？  
楫齊揚以容與兮，哀見君而不再得。  
望長楸而太息兮，涕淫淫其若霰。  
過夏首而西浮兮，顧龍門而不見。  
心嬋媛而傷懷兮，眇不知其所蹇。  
順風波以從流兮，焉洋洋而為客。  
凌陽侯之汜濫兮，忽翱翔之焉薄。  
心絙結而不解兮，思蹇產而不釋。  
將運舟而下浮兮，上洞庭而下江。  
去終古之所居兮，今適遙而來東。  
羌靈寃之欲歸兮，何須臾而忘反。  
背夏浦而西思兮，哀故都之日遠。  
登大墳以遠望兮，聊以舒吾憂心。  
哀州土之平樂兮，悲江介之遺風。

當陵陽之焉至兮，淼南渡之焉如？  
曾不知夏之為丘兮，孰兩東門之可蕪？  
心不怡之長久兮，憂與愁其相接。  
惟郢路之遼遠兮，江與夏之不可涉。  
忽若去不信兮，至今九年而不復。  
慘鬱鬱而不通兮，蹇侘傺而含戚。  
外承歡之灼約兮，諶荏弱而難持。  
忠湛湛而願進兮，妒被離而鄣之。  
堯舜之抗行兮，瞭杳杳而薄天。  
眾讒人之嫉妒兮，被以不慈之偽名。  
憎慍倫之脩美兮，好夫人之忼慨。  
眾蹀躞而日進兮，美超遠而逾邁。

亂曰：

曼余日以流觀兮，冀壹反之何時。  
鳥飛反故鄉兮，狐死必首丘。  
信非吾罪而棄逐兮，何日夜而忘之！

### 抽思

心鬱鬱之憂思兮，獨永歎乎增傷。  
思蹇產之不釋兮，曼遭夜之方長。  
悲秋風之動容兮，何回極之浮浮。  
數惟蓀之多怒兮，傷余心之優優。  
願搖起而橫奔兮，覽民尤以自鎮。

結微情以陳詞兮，矯以遺夫美人。  
昔君與我誠言兮，曰黃昏以為期。  
羌中道而回畔兮，反既有此他志。  
僑吾以其美好兮，覽余以其脩姱。  
與余言而不信兮，蓋為余而造怒。  
願承閒而自察兮，心震悼而不敢；  
悲夷猶而冀進兮，心怛傷之憺憺。  
茲歷情以陳辭兮，蓀詳聾而不聞。  
固切人之不媚兮，眾果以我為患。  
初吾所陳之耿著兮，豈至今其庸亡？  
何毒藥之謾謾兮？願蓀美之可完。  
望三五以為像兮，指彭咸以為儀。  
夫何極而不至兮，故遠聞而難虧。  
善不由外來兮，名不可以虛作。  
孰無施而有報兮，孰不實而有穫？  
少歌曰：與美人抽怨兮，並日夜而無正。  
僑吾以其美好兮，敖朕辭而不聽。  
倡曰：有鳥自南兮，來集漢北。  
好姱佳麗兮，胖獨處此異域。  
既惇獨而不羣兮，又無良媒在其側。  
道卓遠而日忘兮，願自申而不得。  
望北山而流涕兮，臨流水而太息。  
望孟夏之短夜兮，何晦明之若歲！

惟郢路之遼遠兮，覓一夕而九逝。  
曾不知路之曲直兮，南指月與列星。  
願徑逝而未得兮，覓識路之營營。  
何靈覓之信直兮，人之心不與吾心同！  
理弱而媒不通兮，尚不知余之從容。

亂曰：

長瀨湍流，沂江潭兮。  
狂顧南行，聊以娛心兮。  
軫石歲嵬，蹇吾願兮。  
超回志度，行隱進兮。  
低徊夷猶，宿北姑兮。  
煩冤瞽容，實沛徂兮。  
愁歎苦神，靈遙思兮。  
路遠處幽，又無行媒兮。  
道思作頌，聊以自救兮。  
憂心不遂，斯言誰告兮。

### 懷沙

滔滔孟夏兮，草木莽莽。  
傷懷永哀兮，汨徂南土。  
眇兮杳杳，孔靜幽默。  
鬱結紆軫兮，離愍而長鞠。  
撫情效志兮，冤屈而自抑。

刊方以為園兮，常度未替。  
易初本迪兮，君子所鄙。  
章畫志墨兮，前圖未改。  
內厚質正兮，大人所盛。  
巧倖不斲兮，孰察其撥正。  
玄文處幽兮，矇眊謂之不章；  
離婁微睇兮，瞽以為無明。  
變白以為黑兮，倒上以為下。  
鳳皇在笄兮，雞鶩翔舞。  
同糶玉石兮，一槩而相量。  
夫惟黨人鄙固兮，羌不知余之所臧。  
任重載盛兮，陷滯而不濟。  
懷瑾握瑜兮，窮不知所示。  
邑犬之群吠兮，吠所怪也。  
非俊疑傑兮，固庸態也。  
文質疏內兮，眾不知余之異采。  
材朴委積兮，莫知余之所有。  
重仁襲義兮，謹厚以為豐。  
重華不可選兮，孰知余之從容！  
古固有不竝兮，豈知其何故？  
湯禹久遠兮，邈而不可慕。  
懲連改忿兮，抑心而自彊。  
離慙而不遷兮，願志之有像。

進路北次兮，日昧昧其將暮。  
舒憂娛哀兮，限之以大故。

亂曰：

浩浩沅湘，分流汨兮。  
脩路幽蔽，道遠忽兮。  
懷質抱情，獨無匹兮。  
伯樂既沒，驥焉程兮？  
萬民之生，各有所錯兮。  
定心廣志，余何畏懼兮？  
曾傷爰哀，永歎喟兮。  
世溷濁莫吾知，人心不可謂兮。  
知死不可讓，願勿愛兮。  
明告君子，吾將以為類兮。

### 思美人

思美人兮，擘涕而竚眙。  
媒絕路阻兮，言不可結而詒。  
蹇蹇之煩冤兮，陷滯而不發。  
申旦以舒中情兮，志沈菀而莫達。  
願寄言於浮雲兮，遇豐隆而不將。  
因歸鳥而致辭兮，羌迅高而難當。  
高辛之靈盛兮，遭玄鳥而致詒。  
欲變節以從俗兮，媿易初而屈志。

獨歷年而離愍兮，羌馮心猶未化。  
寧隱閔而壽考兮，何變易之可為！  
知前轍之不遂兮，未改此度。  
車既覆而馬顛兮，蹇獨懷此異路。  
勒騏驥而更駕兮，造父為我操之。  
遷逡次而勿驅兮，聊假日以須時。  
指幡冢之西隈兮，與纁黃以為期。  
開春發歲兮，白日出之悠悠。  
吾將蕩志而愉樂兮，遵江夏以娛憂。  
擘大薄之芳茝兮，攀長洲之宿莽。  
惜吾不及古人兮，吾誰與玩此芳草？  
解篇薄與雜菜兮，備以為交佩。  
佩繽紛以繚轉兮，遂萎絕而離異。  
吾且儵徊以娛憂兮，觀南人之變態。  
竊快在中心兮，揚厥憑而不埃。  
芳與澤其雜糅兮，羌芳華自中出。  
紛郁郁其遠承兮，滿內而外揚。  
情與質信可保兮，羌居蔽而聞章。  
今薜荔以為理兮，憚舉趾而緣木。  
因芙蓉而為媒兮，憚蹇裳而濡足。  
登高吾不說兮，入下吾不能。  
固朕形之不服兮，然容與而狐疑。  
廣遂前畫兮，未改此度也。

命則處幽吾將罷兮，願及白日之未暮。  
獨茆茆而南行兮，思彭咸之故也。

### 惜往日

惜往日之曾信兮，受命詔以昭詩。  
奉先功以照下兮，明法度之嫌疑。  
國富強而法立兮，屬貞臣而日嫉。  
秘密事之載心兮，雖過失猶弗治。  
心純脰而不泄兮，遭讒人而嫉之。  
君含怒而待臣兮，不清澈其然否。  
蔽晦君之聰明兮，虛惑誤又以欺。  
弗參驗以考實兮，遠遷臣而弗思。  
信讒諛之溷濁兮，盛氣志而過之。  
何貞臣之無辜兮，被離謗而見尤。  
慙光景之誠信兮，身幽隱而備之。  
臨沅湘之玄淵兮，遂自忍而沈流。  
卒沒身而絕名兮，惜壅君之不昭。  
君無度而弗察兮，使芳草為藪幽。  
焉舒情而抽信兮，恬死亡而不聊。  
獨鄣壅而蔽隱兮，使貞臣為無由。  
聞百里之為虜兮，伊尹烹於庖廚。  
呂望屠於朝歌兮，甯戚歌而飯牛。  
不逢湯武與桓繆兮，世孰云而知之。



吳信讒而弗味兮，子胥死而後憂。  
介子忠而立枯兮，文君寤而追求。  
封介山而為之禁兮，報大德之優游。  
思久故之親身兮，因縞素而哭之。  
或忠信而死節兮，或訑謾而不疑。  
弗省察而按實兮，聽讒人之虛辭。  
芳與澤其雜糅兮，孰申旦而別之？  
何芳草之早殀兮，微霜降而下戒。  
諒聰不明而蔽壅兮，使讒諛而日得。  
自前世之嫉賢兮，謂蕙若其不可佩。  
妒佳冶之芬芳兮，嫫母姣而自好。  
雖有西施之美容兮，讒妒入以自代。  
願陳情以白行兮，得罪過之不意。  
情冤見之曰明兮，如列宿之錯置。  
乘騏驥而馳騁兮，無轡銜而自載；  
乘汎汎以下流兮，無舟楫而自備。  
背法度而心治兮，辟與此其無異。  
寧溘死而流亡兮，恐禍殃之有再。  
不畢辭而赴淵兮，惜壅君之不識。

### 橘頌

后皇嘉樹，橘徠服兮。  
受命不遷，生南國兮。

深固難徙，更壹志兮。  
綠葉素榮，紛其可喜兮。  
曾枝剌棘，圓果搏兮。  
青黃雜糅，文章爛兮。  
精色內白，類可任兮。  
紛緼宜脩，媵而不醜兮。  
嗟爾幼志，有以異兮。  
獨立不遷，豈不可喜兮？  
深固難徙，廓其無求兮。  
蘇世獨立，橫而不流兮。  
閉心自慎，不終失過兮。  
秉德無私，參天地兮。  
願歲并謝，與長友兮。  
淑離不淫，梗其有理兮。  
年歲雖少，可師長兮。  
行比伯夷，置以為像兮。

### 悲回風

悲回風之搖蕙兮，心冤結而內傷；  
物有微而隕性兮，聲有隱而先倡。  
夫何彭咸之造思兮，暨志介而不忘！  
萬變其情豈可蓋兮，孰虛偽之可長！  
鳥獸鳴以號群兮，草苴比而不芳。

魚茸鱗以自別兮，蛟龍隱其文章；  
故荼薺不同畝兮，蘭茝幽而獨芳。  
惟佳人之永都兮，更統世而自貺。  
眇遠志之所及兮，憐浮雲之相羊；  
介眇志之所惑兮，竊賦詩之所明。  
惟佳人之獨懷兮，折若椒以自處；  
曾歔歔之嗟嗟兮，獨隱伏而思慮。  
涕泣交而淒淒兮，思不眠以至曙。  
終長夜之曼曼兮，掩此哀而不去。  
寤從容以周流兮，聊逍遙以自恃；  
傷太息之愍憐兮，氣於邑而不可止。  
糾思心以為纏兮，編愁苦以為膺；  
折若木以蔽光兮，隨飄風之所仍。  
存髣髴而不見兮，心踴躍其若湯。  
撫珮衽以案志兮，超惘惘而遂行。  
歲芻芻其若頽兮，時亦冉冉而將至；  
蘋蘩槁而節離兮，芳以歇而不比。  
憐思心之不可懲兮，證此言之不可聊；  
寧溘死而流亡兮，不忍為此之常愁。  
孤子吟而捩淚兮，放子出而不還；  
孰能思而不隱兮，照彭咸之所聞。  
登石巒以遠望兮，路眇眇之默默；  
入景響之無應兮，聞省想而不可得。

愁鬱鬱之無快兮，居戚戚而不可解；  
心鞿羈而不形兮，氣繚轉而自締。  
穆眇眇之無垠兮，莽芒芒之無儀；  
聲有隱而相感兮，物有純而不可為。  
藐蔓蔓之不可量兮，縹緜緜之不可紆。  
愁悄悄之常悲兮，翩冥冥之不可娛。  
凌大波而流風兮，託彭咸之所居。  
上高巖之峭岸兮，處雌蜺之標顛；  
據青冥而攄虹兮，遂儻忽而捫天。  
吸湛露之浮源兮，漱凝霜之雰雰；  
依風穴以自息兮，忽傾寤以嬋媛。  
馮崑崙以瞰霧兮，隱岷山以清江；  
憚涌湍之礚礚兮，聽波聲之洶洶。  
紛容容之無經兮，罔芒芒之無紀；  
軋洋洋之無從兮，馳委移之焉止？  
漂翻翻其上下兮，翼遙遙其左右。  
汜濺濺其前後兮，伴張弛之信期。  
觀炎氣之相仍兮，窺煙液之所積。  
悲霜雪之俱下兮，聽潮水之相擊。  
借光景以往來兮，施黃棘之枉策。  
求介子之所存兮，見伯夷之放跡。  
心調度而弗去兮，刻著志之無適；  
曰：吾怨往昔之所冀兮，悼來者之慙慙。

浮江淮而入海兮，從子胥而自適。  
望大河之洲渚兮，悲申徒之抗迹。  
驟諫君而不聽兮，重任石之何益？  
心絳結而不解兮，思蹇產而不釋。

## 卷五 遠遊

悲時俗之迫阨兮，願輕舉而遠遊。  
質菲薄而無因兮，焉托乘而上浮？  
遭沈濁而污穢兮，獨鬱結其誰語！  
夜耿耿而不寐兮，魂煢煢而至曙。  
惟天地之無窮兮，哀人生之長勤，  
往者余弗及兮，來者吾不聞，  
步徙倚而遙思兮，怊惝怳而乖懷。  
意荒忽而流蕩兮，心愁淒而增悲。  
神儻忽而不反兮，形枯槁而獨留。  
內惟省以端操兮，求正氣之所由。  
漠虛靜以恬愉兮，澹無為而自得。  
聞赤松之清塵兮，願承風乎遺則。  
貴真人之休德兮，美往世之登仙，  
與化去而不見兮，名聲著而日延。  
奇傳說之托辰星兮，羨韓眾之得一。  
形穆穆以浸遠兮，離人群而遁逸。  
因氣變而遂曾舉兮，忽神奔而鬼怪。  
時髣髴以遙見兮，精皎皎以往來。  
超氛埃而淑尤兮，終不反其故都。  
免眾患而不懼兮，世莫知其所如。  
恐天時之代序兮，耀靈曄而西征。

微霜降而下淪兮，悼芳草之先零。  
聊仿佯而逍遙兮，永歷年而無成。  
誰可與玩斯遺芳兮？晨向風而舒情。  
高陽邈以遠兮，余將焉所程？  
重曰：春秋忽其不淹兮，奚久留此故居？  
軒轅不可攀援兮，吾將從王喬而娛戲。  
餐六氣而飲沆瀣兮，漱正陽而含朝霞。  
保神明之清澄兮，精氣入而羶穢除。  
順凱風以從遊兮，至南巢而壹息。  
見王子而宿之兮，審壹氣之和德。  
曰：「道可受兮，不可傳，  
其小無內兮，其大無垠，  
無滑而窺兮，彼將自然，  
壹氣孔神兮，於中夜存，  
虛以待之存，無以為先。  
庶類以成兮，此德之門。」  
聞至貴而遂徂兮，忽乎吾將行。  
仍羽人於丹丘，留不死之舊鄉。  
朝濯髮於湯谷兮，夕晞余身兮九陽。  
吸飛泉之微液兮，懷琬琰之華英。  
玉色頰以晚顏兮，精醇粹而始壯。  
質銷鑠以洵約兮，神要眇以淫放。  
嘉南州之炎德兮，麗桂樹之冬榮。

山蕭條而無獸兮，野寂漠其無人。  
載營魄而登霞兮，掩浮雲而上征。  
命天閻其開關兮，排閭闔而望予。  
召豐隆使先導兮，問大微之所居。  
集重陽入帝宮兮，造旬始而觀清都。  
朝發軔於太儀兮，夕始臨乎於微閭。  
屯余車之萬乘兮，紛溶與而並馳。  
駕八龍之婉婉兮，載雲旗之逶蛇。  
建雄虹之采旄兮，五色雜而炫耀。  
服偃蹇以低昂兮，驂連蜷以驕驚。  
騎膠葛以雜亂兮，斑漫衍而方行。  
撰余轡而正策兮，吾將過乎句芒。  
歷太皓以右轉兮，前飛廉以啟路。  
陽杲杲其未光兮，凌天地以徑度。  
風伯為作先驅兮，氛埃辟而清涼。  
鳳凰翼其承旂兮，遇蓐收乎西皇。  
擘慧星以為旂兮，舉斗柄已為麾。  
叛陸離其上下兮，遊驚霧之流波。  
時曖曖其曠莽兮，召玄武而奔屬。  
後文昌使掌行兮，選署眾神以並轂。  
路曼曼其修遠兮，徐弭節而高厲。  
左雨師使徑侍兮，右雷公以為衛。  
欲度世以忘歸兮，意姿睢以担擣。



內欣欣而自美兮，聊媮娛已自樂。  
涉青雲以汜濫游兮，忽臨睨夫舊鄉。  
僕夫懷余心悲兮，邊馬顧而不行。  
思舊故已想像兮，長太息而掩涕。  
泛容與而遐舉兮，聊抑志而自弭。  
指炎神而直馳兮，吾將往乎南疑。  
覽方外之荒忽兮，沛罔象而自浮。  
祝融戒而還衡兮，騰告鸞鳥迎宓妃。  
張咸池奏承雲兮，二女御九韶歌。  
使湘靈鼓瑟兮，令海若舞馮夷。  
玄螭蟲象並出進兮，形繆虬而透蛇。  
雌蜺便娟以增撓兮，鸞鳥軒翥而翔飛。  
音樂博衍無終極兮，焉乃逝已徘徊。  
舒并節已馳騫兮，連絕垠乎寒門。  
軼迅風於清源兮，從顛頂乎增冰。  
歷玄冥已邪徑兮，乘間維已反顧。  
召黔羸而見之兮，為余先乎平路。  
經營四荒兮，周流六漠。  
上至列缺兮，降望大壑。  
下崢嶸而無地兮，上寥廓而無天。  
視儻忽而無見兮，聽惝怳而無聞。  
超無為已至清兮，與泰初而為鄰。

## 卷六 卜居

屈原既放，三年不得復見。竭知盡忠，而蔽鄣於讒。心煩慮亂，不知所從。往見太卜鄭詹尹，曰：「余有所疑，願因先生決之。」詹尹乃端策拂龜，曰：「君將何以教之？」

屈原曰：「吾寧悃悃款款，朴以忠乎？將送往勞來，斯無窮乎？寧誅鋤草茅，以力耕乎？將游大人，以成名乎？寧正言不諱，以危身乎？將從俗富貴，以媮生乎？寧超然高舉，已保真乎？將呶訾栗斯，喔咿儒兒，以事婦人乎？寧廉潔正直，以自清乎？將突梯滑稽，如脂如韋，以潔楹乎？寧昂昂若千里之駒乎？將汜汜若水中之鳧乎，與波上下，偷以全吾軀乎？寧與騏驥亢軛乎？將隨騶馬之跡乎？寧與黃鵠比翼乎？將與雞鶩爭食乎？此孰吉孰凶？何去何從？世溷濁而不清，蟬翼為重，千鈞為輕；黃鐘毀棄，瓦釜雷鳴；讒人高張，賢士無名。吁嗟默默兮，誰知吾之廉貞！」

詹尹乃釋策而謝，曰：「夫尺有所短，寸有所長，物有所不足，智有所不明，數有所不逮，神有所不通。用君之心，行君之意，龜策誠不能知事。」

## 卷七 漁父

屈原既放，遊於江潭，行吟澤畔，顏色憔悴，形容枯槁。漁父見而問之曰：

「子非三閭大夫與？何故至於斯！」

屈原曰：「舉世皆濁我獨清，眾人皆醉我獨醒，是以見放！」

漁父曰：「聖人不凝滯於物，而能與世推移。世人皆濁，何不滌其泥而揚其波？眾人皆醉，何不鋪其糟而歎其醜？何故深思高舉，自令放為？」

屈原曰：「吾聞之，新沐者必彈冠，新浴者必振衣；安能以身之察察，受物之汶汶者乎！寧赴湘流，葬於江魚之腹中。安能以皓皓之白，而蒙世俗之塵埃乎！」

漁父莞爾而笑，鼓枻而去。歌曰：「滄浪之水清兮，可以濯吾纓。滄浪之水濁兮，可以濯吾足。」遂去不復與言。

## 卷八 九辯

### (一)

悲哉！秋之為氣也。

蕭瑟兮，草木搖落而變衰。

僚慄兮，若在遠行。

登山臨水兮，送將歸。

沆寥兮，天高而氣清；

寂寥兮，收潦而水清。

慙悽增欷兮，薄寒之中人；

愴愴懷恨兮，去故而就新；

坎廩兮，貧士失職而志不平；

廓落兮，羈旅而無友生；

惆悵兮，而私自憐。

燕翩翩其辭歸兮，蟬寂漠而無聲。

鴈靡靡而南遊兮，鷓鴣啁哳而悲鳴。

獨申旦而不寐兮，哀蟋蟀之宵征。

時躑躅而過中兮，蹇淹留而無成。

### (二)

悲憂窮戚兮獨處廓，有美一人兮心不釋；

去鄉離家兮徠遠客，超逍遙兮今焉薄！

專思君兮不可化，君不知兮可柰何！

蓄怨兮積思，心煩憺兮忘食事。

願一見兮道余意，君之心兮與余異。  
車既駕兮謁而歸，不得見兮心傷悲。  
倚結軫兮長太息，涕潺湲兮下霑軾。  
伉慨絕兮不得，中瞽亂兮迷惑。  
私自憐兮何極？心怛怛兮諒直。

(三)

皇天平分四時兮，竊獨悲此廩秋。  
白露既下百草兮，奄離披此梧楸。  
去白日之昭昭兮，襲長夜之悠悠。  
離芳藹之方壯兮，余萎約而悲愁。  
秋既先戒以白露兮，冬又申之以嚴霜。  
收恢台之孟夏兮，然欲僚而沈藏。  
葉菸邑而無色兮，枝煩拏而交橫。  
顏淫溢而將罷兮，柯彷彿而萎黃。  
萌櫛慘之可哀兮，形銷鑠而瘵傷。  
惟其紛糅而將落兮，恨其失時而無當。  
擘駢轡而下節兮，聊逍遙以相伴。  
歲忽忽而邁盡兮，恐余壽之弗將。  
悼余生之不時兮，逢此世之狂攘。  
澹容與而獨倚兮，蟋蟀鳴此西堂。  
心慌惕而震盪兮，何所憂之多方。  
印明月而太息兮，步列星而極明。

(四)

竊悲夫蕙華之曾敷兮，紛旖旎乎都房。  
何曾華之無實兮，從風雨而飛颺！  
以為君獨服此蕙兮，羌無以異於眾芳。  
閔奇思之不通兮，將去君而高翔。  
心閔憐之慘悽兮，願一見而有明。  
重無怨而生離兮，中結軫而增傷。  
豈不鬱陶而思君兮？君之門以九重！  
猛犬狺狺而迎吠兮，關梁閉而不通。  
皇天淫溢而秋霖兮，後土何時而得乾？  
塊獨守此無澤兮，仰浮雲而永歎！

(五)

何時俗之工巧兮？背繩墨而改錯！  
卻騏驥而不乘兮，策駑駘而取路。  
當世豈無騏驥兮，誠莫之能善御。  
見執轡者非其人兮，故駒跳而遠去。  
鳧鴈皆嗟夫梁藻兮，鳳愈飄翔而高舉。  
圓鑿而方柄兮，吾固知其鉏鋸而難入。  
眾鳥皆有所登棲兮，鳳獨遑遑而無所集。  
願銜枚而無言兮，嘗被君之渥洽。  
太公九十乃顯榮兮，誠未遇其匹合。  
謂騏驥兮安歸？謂鳳皇兮安棲？  
變古易俗兮世衰，今之相者兮舉肥。

騏驥伏匿而不見兮，鳳皇高飛而不下。  
鳥獸猶知懷德兮，何云賢士之不處？  
驥不驟進而求服兮，鳳亦不貪餽而妄食。  
君棄遠而不察兮，雖願忠其焉得？  
欲寂寞而絕端兮，竊不敢忘初之厚德。  
獨悲愁其傷人兮，馮鬱鬱其何極？

(六)

霜露慘悽而交下兮，心尚幸其弗濟。  
霰雪霏糝其增加兮，乃知遭命之將至。  
願微幸而有待兮，泊莽莽與壅草同死。  
願自往而徑游兮，路壅絕而不通。  
欲循道而平驅兮，又未知其所從。  
然中路而迷惑兮，自壓按而學誦。  
性愚陋以褊淺兮，信未達乎從容。

(七)

竊美申包胥之氣盛兮，恐時世之不固。  
何時俗之工巧兮？滅規矩而改鑿！  
獨耿介而不隨兮，願慕先聖之遺教。  
處濁世而顯榮兮，非余心之所樂。  
與其無義而有名兮，寧窮處而守高。  
食不媮而為飽兮，衣不苟而為溫。  
竊慕詩人之遺風兮，願託志乎素餐。  
蹇充偃而無端兮，泊莽莽而無垠。

無衣裘以御冬兮，恐溘死不得見乎陽春。

(八)

靚杪秋之遙夜兮，心繚悵而有哀。  
春秋遑遑而日高兮，然惆悵而自悲。  
四時遞來而卒歲兮，陰陽不可與儷偕。  
白日晼晚其將入兮，明月銷鑠而滅毀。  
歲忽忽而適盡兮，老冉冉而愈弛。  
心搖悅而日幸兮，然怊悵而無冀。  
中慳惻之悽愴兮，長太息而增歎。  
年洋洋以日往兮，老嶮廓而無處。  
事亶亶而覬進兮，蹇淹留而躊躇。

(九)

何汨濫之浮雲兮？森壅蔽此明月。  
忠昭昭而願見兮，然露晷而莫達。  
願皓日之顯行兮，雲蒙蒙而蔽之。  
竊不自料而願忠兮，或黜點而汙之。  
堯舜之抗行兮，瞭冥冥而薄天。  
何險巇之嫉妒兮？被以不慈之偽名。  
彼日月之照明兮，尚黯黹而有瑕。  
何況一國之事兮，亦多端而膠加。  
被荷裊之晏晏兮，然潢洋而不可帶。  
既驕美而伐武兮，負左右之耿介。  
憎慍倫之修美兮，好夫人之慷慨。

眾踳躄而日進兮，美超遠而逾邁。  
農夫輟耕而容與兮，恐田野之蕪穢。  
事繇繇而多私兮，竊悼後之危敗。  
世雷同而炫曜兮，何毀譽之昧昧！  
今修飾而窺鏡兮，後尚可以竄藏。  
願寄言夫流星兮，羌儻忽而難當。  
卒壅蔽此浮雲，下暗漠而無光。

(十)

堯舜皆有所舉任兮，故高枕而自適。  
諒無怨於天下兮，心焉取此怵惕？  
棄騏驥之瀏瀏兮，馭安用夫強策？  
諒城郭之不足恃兮，雖重介之何益？  
遭翼翼而無終兮，恇惛惛而愁約。  
生天地之若過兮，功不成而無効。  
願沈滯而不見兮，尚欲布名乎天下。  
然潢洋而不遇兮，直恂愁而自苦。  
莽洋洋而無極兮，忽翱翔之焉薄？  
國有驥而不棄兮，焉皇皇而更索？  
寧戚謳於車下兮，桓公聞而知之。  
無伯樂之相善兮，今誰使乎譽之？  
罔流涕以聊慮兮，惟著意而得之。  
紛純純之願忠兮，妬被離而鄣之。



亂曰：

願賜不肖之軀而別離兮，放遊志乎雲中。

稟精氣之搏搏兮，驚諸神之湛湛。

驂白霓之習習兮，歷群靈之豐豐。

左朱雀之芟芟兮，右蒼龍之躍躍。

屬雷師之闐闐兮，通飛廉之衙衙。

前輕鯨之鏘鏘兮，後輜檠之從從。

載雲旗之委蛇兮，扈屯騎之容容。

計專專之不可化兮，願遂推而為臧。

賴皇天之厚德兮，還及君之無恙。

## 卷九 招魂

朕幼清以廉潔兮，身服義而未沫。

主此盛德兮，牽於俗而蕪穢。

上無所考此盛德兮，長離殃而愁苦。

帝告巫陽曰：「有人在下，我欲輔之。魂魄離散，汝筮予之。」

巫陽對曰：「掌夢！上帝其命難從；若必筮予之，恐後之謝，不能復用。」

巫陽焉乃下招曰：

「魂兮歸來！去君之恆乾，何為四方些？」

捨君之樂處，而離彼不祥些。

魂兮歸來！東方不可已托些。

長人千仞，惟魂是索些。

十日代出，流金鑠石些。

彼皆習之，魂往必釋些。

歸來兮！不可已托些。

魂兮歸來！南方不可以止些。

雕題黑齒，得人肉以祀，以其骨為醢些。

蝮蛇綦綦，封狐千里些。

雄虺九首，往來儻忽，吞人以益其心些。

歸來兮！不可久淫些。

魂兮歸來！西方之害，流沙千里些。

旋入雷淵，靡散而不可止些。  
幸而得脫，其外曠宇些。  
赤螳若象，玄蜂若壺些。  
五穀不生，藜菅是食些。  
其土爛人，求水無所得些。  
彷徨無所倚，廣大無所極些。  
歸來兮！恐自遺賊些。

魂兮歸來！北方不巳止些。  
增冰峨峨，飛雪千里些。  
歸來兮！不可以久些。

魂兮歸來！君無上天些。  
虎豹九關，啄害下人些。  
一夫九首，拔木九千些。  
豺狼從目，往來僦僦些。  
懸人以娛，投之深淵些。  
致命於帝，然後得瞑些。  
歸來！往恐危身些。

魂兮歸來！君無下此幽都些。  
土伯九約，其角鬻鬻些。  
敦胥血拇，逐人侖馯馯些。

參日虎首，其身若牛些。  
此皆甘人。  
歸來！恐自遺災些。

魂兮歸來！入修門些。  
工祝招君，背行先些。  
秦篝齊縷，鄭綿絡些。  
招具該備，永嘯呼些。  
魂兮歸來！反故居些。  
天地四方，多賊姦些。  
像設君室，靜閒安些。  
高堂邃宇，檻層軒些。  
層台累榭，臨高山些。  
網戶朱綴，刻方連些。  
冬有突厦，夏室寒些。  
川谷徑復，流潺湲些。  
光風轉蕙，汜崇蘭些。  
經堂入奧，朱塵筵些。  
砥室翠翹，掛曲瓊些。  
翡翠珠被，爛齊光些。  
蒨阿拂壁，羅幃張些。  
纂組綺縞，結琦璜些。  
室中之觀，多珍怪些。

蘭膏明燭，華容備些。  
二八侍宿，射遞代些。  
九侯淑女，多迅眾些。  
盛鬋不同制，實滿宮些。  
容態好比，順彌代些。  
弱顏固植，謗其有意些。  
姱容修態，緬洞房些。  
蛾眉曼睩，目騰光些。  
靡顏膩理，遺視聽些。  
離榭修幕，侍君之閒些。  
悲帷翠帳，飾高堂些。  
紅壁沙版，玄玉梁些。  
仰觀刻桷，畫龍蛇些。  
坐堂伏檻，臨曲池些。  
芙蓉始發，雜芰荷些。  
紫莖屏風，文緣波些。  
文異豹飾，侍陂陀些。  
軒輦既低，步騎羅些。  
蘭薄戶樹，瓊木籬些。  
魂兮歸來！何遠為些。  
室家遂宋，食多方些。  
稻粢穡麥，挈黃梁些。

大苦鹹酸，辛甘行些。  
肥牛之臠，臠若芳些。  
和酸若苦，陳吳羹些。  
醜鱉炮羔，有柘漿些。  
鵠酸臠臠，煎鴻鶩些。  
露雞臠蠡，厲而不爽些。  
糗粢蜜餌，有粳餽些。  
瑤漿蜜勺，實羽觴些。  
挫糟凍飲，耐清涼些。  
華酌既陳，有瓊漿些。  
歸來反故室，敬而無防些。  
餽羞未通，女樂羅些。  
嗽鍾按鼓，造新歌些。  
涉江采菱，發揚荷些。  
美人既醉，朱顏酡些。  
娛光眇視，目曾波些。  
被文服纖，麗而不奇些。  
長髮曼髻，艷陸離些。  
二八齊容，起鄭舞些。  
衽若交竿，撫案下些。  
竽瑟狂會，瑱鳴鼓些。  
宮庭震驚，發激楚些。  
吳歛蔡謳，奏大呂些。

士女雜坐，亂而不分些。  
放陳組纓，班其相紛些。  
鄭衛妖玩，來雜陳些。  
激楚之結，獨秀先些。  
菑蔽象棊，有六簿些。  
分曹並進，適相迫些。  
成梟而牟，呼五白些。  
晉制犀比，費白日些。  
鏗鍾搖箏，楔梓瑟些。  
娛酒不廢，沈日夜些。  
蘭膏明燭，華燈錯些。  
結撰至思，蘭芳假些。  
人有所極，同心賦些。  
酌飲盡歡，樂先故些。  
魂兮歸來！反故居些。

亂曰：

獻歲發春兮，汨吾南征。  
葦蘋齊葉兮，白芷生。  
路貫廬江兮，左長薄。  
倚沼畦瀛兮，遙望博。  
青驪結駟兮，齊千乘。  
懸火延起兮，玄顏烝。

步及驟處兮，誘騁先。  
抑驚若通兮，引車右還。  
與王趨夢兮，課後先。  
君王親發兮，憚青兕。  
朱明承夜兮，時不可以淹。  
皋蘭被徑兮，斯路漸。  
湛湛江水兮，上有楓。  
目極千里兮，傷春心。  
魂兮歸來！哀江南！



卷十 大招

青春受謝，白日昭只，春氣奮發，萬物遽只，冥凌浹行，魂無逃只，魂魄歸徠！無遠遙只。

魂乎歸徠！無東無西無南無北只，東有大海，溺水漉漉只，螭龍並流，上下悠悠只，霧雨淫淫，白皓膠只，魂乎無東！湯谷寂只。

魂乎無南！南有炎火千里，蝮蛇蜒只，山林險隘，虎豹蜿只，鰕鱗短狐，王虺騫只，魂乎無南！蜮傷躬只。

魂乎無西！西方流沙，漭洋洋只，豕首縱目，被發鬢只，長爪踞牙，諛笑狂只，魂乎無西！多害傷只。

魂乎無北！北有寒山，趙龍絕只，代水不可涉，深不可測只，天白顛顛，寒凝凝只，魂乎無往！盈北極只。

魂魄歸來！閒以靜只，自恣荊楚，安以定只，逞志究欲，心意安只，窮身永樂，年壽延只，魂乎歸徠！樂不可言只。

五穀六仞，設菰梁只，鼎臠盈望，和致芳只，內鶻鶻，味豺羹只，魂乎歸徠！恣所嘗只。

鮮蠪甘雞，和楚酪只，醢豚苦狗，膾苴尊只，吳酸蒿蕞，不沾薄只，魂乎歸徠！恣所擇只。

炙鴟烝鳧，粘鶉陳只，煎鱖臠雀，遽爽存只，魂乎歸徠！麗以先只。

四酎並孰，不澀隘只，清馨凍飲，不歡役只，吳醴白蘩，和楚瀝只，魂乎歸徠！不遽惕只。

代秦鄭衛，鳴竽張只，伏戲駕辯，楚勞商只，謳和揚阿，趙蕭倡只，魂乎歸徠！定空桑只。

二八接舞，投詩賦只，叩鍾調磬，娛人亂只，四上競氣，極聲變只，魂乎歸徠！聽歌謨只。

朱唇皓齒，嫋以媠只，比德好閒，習以都只，豐肉微骨，調以娛只，魂乎歸徠！安以舒只。

嫋目宜笑，娥眉曼只，容則秀雅，穉朱顏只，魂乎歸徠！靜以安只。

媠修滂浩，麗以佳只，曾頰倚耳，曲眉規只，滂心綽態，姣麗施只，小腰秀頸，若鮮卑只，魂乎歸徠！思怨移只，

易中利心，以動作只，粉白黛黑，施芳澤只，長袂拂面，善留客只，魂乎歸徠！以娛昔只。

青色直眉，美目嫋只，靨輔奇牙，宜笑嚙只，豐肉微骨，體便媠只，魂乎歸徠！恣所便只。

夏屋廣大，沙堂秀只，南房小壇，觀絕霽只，曲屋步墀，宜擾畜只，騰駕步游，獵春囿只，瓊轂錯衡，英華假只，芭蘭桂樹，鬱彌路只，魂乎歸來！恣志慮只。

孔雀盈園，畜鸞皇只，鴟鴻群晨，雜鶩鶴只，鴻鵠代游，曼鸕鷀只，魂乎歸徠！鳳皇翔只。

曼澤怡面，血氣盛只，永宜厥身，保壽命只，室家盈廷，爵祿盛只，魂乎歸徠！居室定只。

接徑千里，出若雲只，三圭重侯，聽類神只，察篤天隱，孤寡存只，魂兮歸徠！正始昆只。

田邑千畝，人阜昌只，美冒眾流，德澤章只，先威後文，善美明只，魂乎歸徠！賞罰當只。

名聲若日，照四海只，德譽配天，萬民理只，北至幽陵，南交阯只，西薄羊腸，東窮海只，魂乎歸徠！尚賢士只。

發政獻行，禁苛暴只，舉傑壓陛，誅譏罷只，直嬴在位，近禹麾只，豪傑執政，流澤施只，魂乎歸徠！國家為只。

雄雄赫赫，天德明只，三公穆穆，登降堂只，諸侯畢極，立九卿只，昭質既設，大侯張只，執弓挾矢，揖辭讓只，魂乎歸徠！尚三王只。

## 卷十一 惜誓

惜余年老而日衰兮，歲忽忽而不反。

登蒼天而高舉兮，歷眾山而日遠。

觀江河之紆曲兮，離四海之霑濡。

攀北極而一息兮，吸沆瀣以充虛。

飛朱鳥使先驅兮，駕太一之象輿。

蒼龍蚺虵於左驂兮，白虎騁而為右駟。

建日月以為蓋兮，載玉女於後車。

馳驚於杳冥之中兮，休息崑崙之墟。

樂窮極而不厭兮，願從容虛神明。

涉丹水而駝騁兮，右大夏之遺風。

黃鵠之一舉兮，知山川之紆曲。

再舉兮，睹天地之圜方。

臨中國之眾人兮，託回飆乎尚羊。

乃至少原之野兮，赤松，王喬皆在旁。

二子擁瑟而調均兮，余因稱乎清商。

澹然而自樂兮，吸眾氣而翱翔。

念我長生而久僊兮，不如反余之故鄉。

黃鵠後時而寄處兮，鴟梟群而制之。

神龍失水而陸居兮，為螻蟻之所裁。

夫黃鵠神龍猶如此兮，況賢者之逢亂世哉。

壽冉冉而日衰兮，固儻回而不息。  
俗流從而不止兮，眾枉聚而矯直。  
或偷合而苟進兮，或隱居而深藏。  
苦稱量之不審兮，同權槩而就衡。  
或推遷而苟容兮，或直言之諤諤。  
傷誠是之不察兮，並紉茅絲以為索。  
方世俗之幽昏兮，眩白黑之美惡。  
放山淵之龜玉兮，相與貴夫礫石。  
梅伯數諫而至醢兮，來革順志而用國。  
悲仁人之盡節兮，反為小人之所賊。  
比干忠諫而剖心兮，箕子被髮而佯狂。  
水背流而源竭兮，木去根而不長。  
非重軀以慮難兮，惜傷身之無功。

已矣哉！

獨不見夫鸞鳳之高翔兮，乃集大皇之壑。  
循四極而回周兮，見盛德而後下。  
彼聖人之神德兮，遠濁世而自藏。  
使麒麟可得羈而係兮，又何以異庖犬羊？

卷十二 招隱士

桂樹叢生兮山之幽，偃蹇連蜷兮枝相繚。

山氣巖從兮石嵯峨，谿谷蘄巖兮水曾波。

猿狖群嘯兮虎豹嘯，攀援桂枝兮聊淹留。

王孫游兮不歸，春草生兮萋萋。

歲暮兮不自聊，蟋蟀鳴兮啾啾。

塊兮軋，山曲崑，心淹留兮恫慌忽。

罔兮沕，僚兮慄，虎豹穴。

叢薄深林兮，人上慄，嶽岑碣磳兮礧礧，樹輪相糾兮林木茂翳。

青莎雜樹兮蘋草蘼靡，白鹿麕麇兮或騰或倚。

狀兒峯峯兮峨峨，淒淒兮澼澼。

獼猴兮熊羆，慕類兮以悲。

攀援桂枝兮聊淹留。

虎豹鬪兮熊羆咆，禽獸駭兮亡其曹。

王孫兮歸來，山中兮不可以久留。

## 卷十三 七諫

### 初放

平生於國兮長於原壑。  
言語訥讒，又無彊輔。  
淺智褊能兮聞見又寡。  
數言便事兮見怨門下。  
王不察其長利兮卒見棄乎原壑。  
伏念思過兮無可改者。  
群眾成朋兮上浸以惑。  
巧佞在前兮賢者滅息。  
堯、舜聖已沒兮孰為忠直？  
高山崔巍兮水流湯湯。  
死日將至兮與麋鹿同坑，塊兮鞠，當道宿。  
舉世皆然兮余將誰告？  
斥逐鴻鵠兮近習鴟梟，斬伐橘柚兮列樹苦桃。  
便娟之修竹兮寄生乎江潭，上葳蕤而防露兮下泠泠而來風。  
孰知其不合兮若竹柏之異心。  
往者不可及兮來者不可待。  
悠悠蒼天兮莫我振理。  
竊怨君之不寤兮吾獨死而後已。

## 沈江

惟往古之得失兮，覽私微之所傷。  
堯舜聖而慈仁兮，後世稱而弗忘。  
齊桓失於專任兮，夷吾忠而名彰。  
晉獻惑於嬖姬兮，申生孝而被殃。  
偃王行其仁義兮，荆文寤而徐亡。  
紂暴虐以失位兮，周得佐乎呂望。  
修往古以行恩兮，封比干之丘壟。  
賢俊慕而自附兮，日浸淫而合同。  
明法令而修理兮，蘭芷幽而有芳。  
苦眾人之妬予兮，箕子寤而佯狂。  
不顧地以貪名兮，心怫鬱而內傷。  
聯蕙芷以為佩兮，過鮑肆而失香。  
正臣端其操行兮，反離謗而見攘。  
世俗更而變化兮，伯夷餓於首陽。  
獨廉潔而不容兮，叔齊久而逾明。  
浮雲陳而蔽晦兮，使日月乎無光。  
忠臣貞而欲諫兮，讒諛毀而在旁。  
秋草榮其將實兮，微霜下而夜降。  
商風肅而害生兮，百草育而不長。  
眾並諧以妬賢兮，孤聖特而易傷。  
懷計謀而不見用兮，巖穴處而隱藏。  
成功隳而不卒兮，子胥死而不葬。



世從俗而變化兮，隨風靡而成行。  
信直退而毀敗兮，虛偽進而得當。  
追悔過之無及兮，豈盡忠而有功。  
廢制度而不用兮，務行私而去公。  
終不變而死節兮，惜年齒之未央。  
將方舟而下流兮，冀幸君之發矇。  
痛忠言之逆耳兮，恨申子之沈江。  
願悉心之所聞兮，遭值君之不聰。  
不開寤而難道兮，不別橫之與縱。  
聽奸臣之浮說兮，絕國家之久長。  
滅規槩而不用兮，背繩墨之正方。  
離憂患而乃寤兮，若縱火於秋蓬。  
業失之而不救兮，尚何論乎禍凶。  
彼離畔而朋黨兮，獨行之士其何望？  
日漸染而不自知兮，秋毫微哉而變容。  
眾輕積而折軸兮，原咎雜而累重。  
赴湘、沅之流澌兮，恐逐波而復東。  
懷沙礫而自沈兮，不忍見君之蔽壅。

## 怨世

世沈淖而難論兮，俗嶮峨而參嵯。  
清泠泠而殲滅兮，溷湛湛而日多。  
梟鴟既以成群兮，玄鶴弭翼而屏移。

蓬艾親人御於床第兮，馬蘭蹠蹕而日加。  
棄捐藥芷與杜衡兮，余柰世之不知芳何？  
何周道之平易兮，然蕪穢而險戲。  
高陽無故而委塵兮，唐虞點灼而毀議。  
誰使正其真是兮，雖有八師而不可為。  
皇天保其高兮，后土持其久。  
服清白以逍遙兮，偏與乎玄英異色。  
西施媢媢而不得見兮，嫫母勃屑而日侍。  
桂蠹不知所淹留兮，蓼蟲不知徙乎葵菜。  
處溷溷之濁世兮，安所達乎吾志。  
意有所載而遠逝兮，固非眾人之所識。  
驥躡蹻於弊輦兮，遇孫陽而得代。  
呂望窮困而不聊生兮，遭周文而舒志。  
甯戚飯牛而商歌兮，桓公聞而弗置。  
路室女之方桑兮，孔子過之以自侍。  
吾獨乖刺而無當兮，心悼恍而耄思。  
思比干之泯泯兮，哀子胥之慎事。  
悲楚人之和氏兮，獻寶玉以為石。  
遇厲武之不察兮，羌兩足以畢斷。  
小人之居勢兮，視忠正之何若？  
改前聖之法度兮，喜囁嚅而妄作。  
親讒諛而疏賢聖兮，訟謂閭媿為醜惡。  
愉近習而蔽遠兮，孰知察其黑白？

卒不得效其心容兮，安眇眇而無所歸薄。  
專精爽以自明兮，晦冥冥而壅蔽。  
年既已過大半兮，然坳軻而留滯。  
欲高飛而遠集兮，恐離罔而滅敗。  
獨冤抑而無極兮，傷精神而壽夭。  
皇天既不純命兮，余生終無所依。  
願自沈於江流兮，絕橫流而徑逝。  
寧為江海之泥塗兮，安能久見此濁世？

### 怨思

賢士窮而隱處兮，廉方正而不容。  
子胥諫而靡軀兮，比干忠而剖心。  
子推自割而飭君兮，德日忘而怨深。  
行明白而曰黑兮，荆棘聚而成林。  
江離棄於窮巷兮，蒺藜蔓乎東廂。  
賢者蔽而不見兮，讒諛進而相朋。  
梟鴞並進而俱鳴兮，鳳皇飛而高翔。  
願壹往而徑逝兮，道壅絕而不通。

### 自悲

居愁懃其誰告兮，獨永思而憂悲。  
內自省而不慙兮，操愈堅而不衰。  
隱三年而無決兮，歲忽忽其若頽。

憐余身不足以卒意兮，冀一見而復歸。  
哀人事之不幸兮，屬天命而委之咸池。  
身被疾而不閒兮，心沸熱其若湯。  
冰炭不可以相並兮，吾固知乎命之不長。  
哀獨苦死之無樂兮，惜余年之未央。  
悲不反余之所居兮，恨離予之故鄉。  
鳥獸驚而失羣兮，猶高飛而哀鳴。  
狐死必首丘兮，夫人孰能不反其真情？  
故人疏而日忘兮，新人近而俞好。  
莫能行於杳冥兮，孰能施於無報？  
苦眾人之皆然兮，乘回風而遠游。  
凌恆山其若陋兮，聊愉娛以忘憂。  
悲虛言之無實兮，苦眾口之鑠金。  
過故鄉而一顧兮，泣歔歔而霑衿。  
厭白玉以為面兮，懷琬琰以為心。  
邪氣入而感內兮，施玉色而外淫。  
何青雲之流瀾兮，微霜降之蒙蒙。  
徐風至而徘徊兮，疾風過之湯湯。  
聞南藩樂而欲往兮，至會稽而且止。  
見韓眾而宿之兮，問天道之所在？  
借浮雲以送予兮，載雌霓而為旌。  
駕青龍以馳騫兮，班衍衍之冥冥。  
忽容容其安之兮，超慌忽其焉如？

苦眾人之難信兮，願離群而遠舉。  
登巒山而遠望兮，好桂樹之冬榮。  
觀天火之炎燭兮，聽大壑之波聲。  
引八維以自道兮，含沆瀣以長生。  
居不樂以時思兮，食草木之秋實。  
飲菌若之朝露兮，構桂木而為室。  
雜橘柚以為囿兮，列新夷與椒楨。  
鷓鴣孤而夜號兮，哀居者之誠貞。

### 哀命

哀時命之不合兮，傷楚國之多憂。  
內懷情之潔白兮，遭亂世而離尤。  
惡耿介之直行兮，世溷濁而不知。  
何君臣之相失兮，上沅湘而分離。  
測汨羅之湘水兮，知時固而不反。  
傷離散之交亂兮，遂側身而既遠。  
處玄舍之幽門兮，穴巖石而窟伏。  
從水蛟而為徒兮，與神龍乎休息。  
何山石之嶄巖兮，靈魂屈而偃蹇。  
含素水而蒙深兮，日眇眇而既遠。  
哀形體之離解兮，神罔兩而無舍。  
惟椒蘭之不反兮，魂迷惑而不知路。  
願無過之設行兮，雖滅沒之自樂。

痛楚國之流亡兮，哀靈修之過到。  
固時俗之溷濁兮，志瞽迷而不知路。  
念私門之正匠兮，遙涉江而遠去。  
念女嬃之嬋媛兮，涕泣流乎於悒。  
我決死而不生兮，雖重追吾何及。  
戲疾瀨之素水兮，望高山之蹇產。  
哀高丘之赤岸兮，遂沒身而不反。

### 謬諫

怨靈修之浩蕩兮，夫何執操之不固？  
悲太山之為隍兮，孰江河之可涸？  
願承閒而效志兮，恐犯忌而干諱。  
卒撫情以寂寞兮，然怊悵而自悲。  
玉與石其同匱兮，貫魚眼與珠璣。  
駑駿雜而不分兮，服罷牛而驂驥。  
年滔滔而自遠兮，壽冉冉而愈衰。  
心怵憚而煩冤兮，蹇超搖而無冀。  
固時俗之工巧兮，滅規矩而改錯。  
卻騏驥而不乘兮，策駑駘而取路。  
當世豈無騏驥兮，誠無王良之善馭。  
見執轡者非其人兮，故駒跳而遠去。  
不量鑿而正柄兮，恐桀矍之不同。  
不論世而高舉兮，恐操行之不調。

弧弓弛而不張兮，孰云知其所至？  
無傾危之患難兮，焉知賢士之所死？  
俗推佞而進富兮，節行張而不著。  
賢良蔽而不羣兮，朋曹比而黨譽。  
邪說飾而多曲兮，正法弧而不公。  
直士隱而避匿兮，讒諛登乎明堂。  
棄彭咸之娛樂兮，滅巧倖之繩墨。  
菑落雜於廢蒸兮，機蓬矢以射革。  
駕蹇驢而無策兮，又何路之能極？  
以直鍼而為釣兮，又何魚之能得？  
伯牙之絕弦兮，無鍾子期而聽之。  
和抱璞而泣血兮，安得良工而剖之？  
同音者相和兮，同類者相似。  
飛鳥號其羣兮，鹿鳴求其友。  
故叩宮而宮應兮，彈角而角動。  
虎嘯而谷風至兮，龍舉而景雲往。  
音聲之相和兮，言物類之相感也。  
夫方圓之異形兮，勢不可以相錯。  
列子隱身而窮處兮，世莫可以寄託。  
眾鳥皆有行列兮，鳳獨翔翔而無所薄。  
經濁世而不得志兮，願側身巖穴而自託。  
欲闔口而無言兮，嘗被君之厚德。  
獨便悞而懷毒兮，愁鬱鬱之焉極？

念三年之積思兮，願壹見而陳辭。  
不及君而騁說兮，世孰可為明之？  
身寢疾而日愁兮，情沈抑而不揚。  
眾人莫可與論道兮，悲精神之不通。

亂曰：

鸞皇孔鳳日以遠兮，奮鳧駕鵝，雞鷲滿堂壇兮，鼃黽游乎華池。  
要褻奔亡兮，騰駕橐駝。  
鉛刀進御兮，遙棄太阿。  
拔攀玄芝兮，列樹芋荷。  
橘柚萎枯兮，苦李旖旎。  
甌甌登於明堂兮，周鼎潛乎深淵。  
自古而固然兮，吾又何怨乎今之人。



## 卷十四 哀時命

哀時命之不及古人兮，夫何予生之不邁時！

往者不可扳援兮，徠者不可與期。

志憾恨而不逞兮，杼中情而屬詩。

夜炯炯而不寐兮，懷隱憂而歷茲。

心鬱鬱而無告兮，眾孰可與深謀！

欲愁悴而委惰兮，老冉冉而逮之。

居處愁以隱約兮，志沈抑而不揚。

道壅塞而不通兮，江河廣而無梁。

願至崑崙之懸圃兮，採鍾山之玉英。

攀瑤木之檀枝兮，望閭風之板桐。

弱水汨其為難兮，路中斷而不通。

勢不能凌波以徑度兮，又無羽翼而高翔。

然隱憫而不達兮，獨徙倚而彷徨。

悵惆罔以永思兮，心紆軫宗而增傷。

倚躊躇以淹畱兮，日饑饉而絕糧。

廓抱景而獨倚兮，超永思乎故鄉。

廓落寂而無友兮，誰可與玩此遺芳？

白日晼晼其將入兮，哀余壽之弗將。

車既弊而馬罷兮，蹇遭徊而不能行。

身既不容於濁世兮，不知進退之宜當。

冠崔嵬而切雲兮，劍淋離而從橫。

衣攝葉以儲與兮，左祛掛於樽桑；  
右衽拂於不周兮，六合不足以肆行。  
上同鑿柄於伏戲兮，下合矩矱於虞唐。  
願尊節而式高兮，志猶卑夫禹湯。  
雖知困其不改操兮，終不以邪枉害方。  
世並舉而好朋兮，壹斗斛而相量。  
眾比周以肩迫兮，賢者遠而隱藏。  
為鳳皇作鶉籠兮，雖翕翅其不容。  
靈皇其不寤知兮，焉陳詞而效忠。  
俗嫉妬而蔽賢兮，孰知余之從容？  
願舒志而抽馮兮，庸詎知其吉凶？  
璋珪雜於甌窰兮，隴廉與孟媵同宮。  
舉世以為恆俗兮，固將愁苦而終窮。  
幽獨轉而不寐兮，惟煩懣而盈匈。  
覓眇眇而馳騁兮，心煩冤之忡。  
志欲憾而不憺兮，路幽昧而甚難。  
塊獨守此曲隅兮，然欲切而永歎。  
愁修夜而宛轉兮，氣涓沸其若波。  
握劊劊而不用兮，操規槩而無所施。  
騁騏驥於中庭兮，焉能極夫遠道？  
置猿狖於櫺檻兮，夫何以責其捷巧？  
駟跛鼈而上山兮，吾固知其不能陞。

釋管晏而任臧獲兮，何權衡之能稱？  
菟籟雜於麋蒸兮，機蓬矢以駭革。  
負檐荷以丈尺兮，欲伸要而不可得。  
外迫脅於機臂兮，上牽聯於矰雉。  
肩傾側而不容兮，固愜腹而不得息。  
務光自投於深淵兮，不獲世之塵垢。  
孰魁摧之可久兮，願退身而窮處。  
鑿山楹而為室兮，下被衣於水渚。  
霧露濛濛其晨降兮，雲依斐而承宇。  
虹霓紛其朝霞兮，夕淫淫而淋雨。  
怊茫茫而無歸兮，悵遠望此曠野。  
下垂釣於谿谷兮，上要求於僊者。  
與赤松而結友兮，比王僑而為耦。  
使梟楊先導兮，白虎為之前後。  
浮雲霧而入冥兮，騎白鹿而容與。  
魂眊眊以寄獨兮，汨徂往而不歸。  
處卓卓而日遠兮，志浩蕩而傷懷。  
鸞鳳翔於蒼雲兮，故矰繳而不能加。  
蛟龍潛於旋淵兮，身不掛於罔羅。  
知貪餌而近死兮，不如下游乎清波。  
寧幽隱以遠禍兮，孰侵辱之可為。  
子胥死而成義兮，屈原沈於汨羅。

雖體解其不變兮，豈忠信之可化。  
志怛怛而內直兮，履繩墨而不頗。  
執權衡而無私兮，稱輕重而不差。  
概塵垢之枉攘兮，除穢累而反真。  
形體白而質素兮，中皎潔而淑清。  
時默飫而不用兮，且隱伏而遠身。  
聊竄端而匿跡兮，嘆寂默而無聲。  
獨便愞而煩毒兮，焉發憤而抒情。  
時曖曖其將罷兮，遂悶歎而無名。  
伯夷死於首陽兮，卒夭隱而不榮。  
太公不遇文王兮，身至死而不得逞。  
懷瑤象而佩瓊兮，願陳列而無正。  
生天墜之若過兮，忽爛漫而無成。  
邪氣襲余之形體兮，疾慳怛而萌生。  
願壹見陽春之白日兮，恐不終乎永年。

## 卷十五 九懷

### 匡機

極運兮不中，來將屈兮困窮？  
余深愍兮慘怛，願一列兮無從。  
乘日月兮上征，顧游心兮鄙豐。  
彌覽兮九隅，彷徨兮蘭宮。  
芷閭兮藥房，奮搖兮眾芳。  
菌閣兮蕙樓，觀道兮從橫。  
寶金兮委積，美玉兮盈堂。  
桂水兮潺湲，揚流兮洋洋。  
蒼蔡兮踴躍，孔鶴兮迴翔。  
撫檻兮遠望，念君兮不忘。  
怫鬱兮莫陳，永懷兮內傷。

### 通路

天門兮墜戶，孰由兮賢者？  
無正兮溷廁，懷德兮何覩？  
假寐兮愍斯，誰可與兮寤語？  
痛鳳兮遠逝，畜鷄兮近處。  
鯨鱗兮幽潛，從蝦兮游渚。  
乘虬兮登陽，載象兮上行。  
朝發兮蔥嶺，夕至兮明光。

北飲兮飛泉，南採兮芝英。  
宣游兮列宿，順極兮彷徨。  
紅采兮駢衣，翠縹兮為裳。  
舒佩兮綸纒，竦余劍兮干將。  
騰蛇兮後從，飛駟兮步旁。  
微觀兮玄圃，覽察兮瑤光。  
啟匱兮探筴，悲命兮相當。  
紉蕙兮永辭，將離兮所思。  
浮雲兮容與，道余兮何之？  
遠望兮仟眠，聞雷兮闐闐。  
陰憂兮感余，惆悵兮自憐。

### 危俊

林不容兮鳴蜩，余何留兮中州？  
陶嘉月兮總駕，攀玉英兮自脩。  
結榮萑兮透逝，將去烝兮遠游。  
徑岱土兮魏闕，歷九曲兮牽牛。  
聊假日兮相伴，遺光耀兮周流。  
望太一兮淹息，紆余轡兮自休。  
晞白日兮皎皎，彌遠路兮悠悠。  
顧列孛兮縹縹，觀幽雲兮陳浮。  
鉅寶遷兮砢礪，雉咸雌兮相求。  
泱莽莽兮究志，懼吾心兮憐憐。

步余馬兮飛柱，覽可與兮匹儔。  
卒莫有兮纖介，永余思兮怆怆。

### 昭世

世溷兮冥昏，違君兮歸真。  
乘龍兮偃蹇，高迴翔兮上臻。  
襲英衣兮緹縹，披華裳兮芳芬。  
登羊角兮扶輿，浮雲漠兮自娛。  
握神精兮雍容，與神人兮相胥。  
流星墜兮成雨，進隣盼兮上丘墟。  
覽舊邦兮滄鬱，余安能兮久居。  
志懷逝兮心慄慄，紆余轡兮躊躇。  
聞素女兮微歌，聽王後兮吹竽。  
魂悽愴兮感哀，腸回回兮盤紆。  
撫余佩兮繽紛，高太息兮自憐。  
使祝融兮先行，令昭明兮開門。  
馳六蛟兮上征，竦余駕兮入冥。  
歷九州兮索合，誰可與兮終生。  
忽反顧兮西園，覩軫丘兮崎傾。  
橫垂涕兮泫流，悲余后兮失靈。

### 尊嘉

季春兮陽陽，列草兮成行。

余悲兮蘭生，委積兮從橫。  
江離兮遺捐，辛夷兮擠臧。  
伊思兮往古，亦多兮遭殃。  
伍胥兮浮江，屈子兮沈湘。  
運余兮念茲，心內兮懷傷。  
望淮兮沛沛，濱流兮則逝。  
榜舫兮下流，東注兮磕磕。  
蛟龍兮導引，文魚兮上瀨。  
抽蒲兮陳坐，援芙蓉兮為蓋。  
水躍兮余旌，繼以兮微蔡。  
雲旗兮電驚，儵忽兮容裔。  
河伯兮開門，迎余兮歡欣。  
顧念兮舊都，懷恨兮艱難。  
竊哀兮浮萍，汎淫兮無根。

### 蓄英

秋風兮蕭蕭，舒芳兮振條。  
微霜兮眇眇，病歿兮鳴蜩。  
玄鳥兮辭歸，飛翔兮靈丘。  
望谿谷兮滄鬱，熊羆兮咆嘯。  
唐虞兮不存，何故兮久留？  
臨淵兮汪洋，顧林兮忽荒。  
修余兮袿衣，騎霓兮南上。



乘雲兮回回，疊疊兮自強。  
將息兮蘭皋，失志兮悠悠。  
蒨蘊兮黻鰲，思君兮無聊。  
身去兮意存，愴恨兮懷愁。

### 思忠

登九靈兮游神，靜安歌兮微晨。  
悲皇丘兮積葛，眾體錯兮交紛。  
貞枝抑兮枯槁，枉車登兮慶雲。  
感余志兮慘慄，心愴愴兮自憐。  
駕玄螭兮北征，躡吾路兮葱嶺。  
連五宿兮建旄，揚氛氣兮為旌。  
歷廣漠兮馳驚，覽中國兮冥冥。  
玄武步兮水母，與吾期兮南榮。  
登華蓋兮乘陽，聊逍遙兮播光。  
抽庫婁兮酌醴，援虬瓜兮接糧。  
畢休息兮遠逝，發玉軻兮西行。  
惟時俗兮疾正，弗可久兮此方。  
寤闢標兮永思，心怫鬱兮內傷。

### 陶壘

覽杳杳兮世惟，余惆悵兮何歸。  
傷時俗兮溷亂，將奮翼兮高飛。

駕八龍兮連蜷，建虹旌兮威夷。  
觀中宇兮浩浩，紛翼翼兮上躋。  
浮溺水兮舒光，淹低徊兮京汴。  
屯余車兮索友，覩皇公兮問師。  
道莫貴兮歸真，羨余術兮可夷。  
吾乃逝兮南娛，道幽路兮九疑。  
越炎火兮萬里，過萬首兮巖巖。  
濟江海兮蟬蛻，絕北梁兮永辭。  
浮雲鬱兮晝昏，霾土忽兮壓壓。  
息陽城兮燎寤，衰色罔兮中怠。  
意曉陽兮燎寤，乃自軫兮在茲。  
思堯舜兮襲興，幸咎繇兮獲謀。  
悲九州兮靡君，撫軾歎兮作詩。

### 株昭

悲哉于嗟兮，心內切磋。  
款冬而生兮，凋彼葉柯。  
瓦礫進寶兮，捐棄隨和。  
鉛刀厲御兮，頓棄太阿。  
驥垂兩耳兮，中坂蹉跎。  
蹇驢服駕兮，無用日多。  
修潔處幽兮，貴寵沙塵。  
鳳皇不翔兮，鶉鴝飛揚。

乘虹驂蜺兮，載雲變化。  
鷓鴣開路兮，後屬青蛇。  
步驟桂林兮，超驤捲阿。  
丘陵翔儻兮，谿谷悲歌。  
神章靈篇兮，赴曲相和。  
余私娛茲兮，孰哉復加。  
還顧世俗兮，壞敗罔羅。  
捲佩將逝兮，涕流滂沱。

亂曰：

皇門開兮照下土，株穢除兮蘭芷覩。  
四佞放兮後得禹，聖舜攝兮昭堯緒，孰能若兮願為輔？

## 卷十六 九歎

### 逢紛

伊伯庸之末胄兮，諒皇直之屈原。  
云余肇祖於高陽兮，惟楚懷之嬋連。  
原生受命於貞節兮，鴻永路有嘉名。  
齊名字於天地兮，並光明於列星。  
吸精粹而吐氛濁兮，橫邪世而不取容。  
行叩誠而不阿兮，遂見排而逢讒。  
後聽虛而黜實兮，不吾理而順情。  
腸憤悒而含怒兮，志遷蹇而左傾。  
心懍慌其不我與兮，躬速速其不吾親。  
辭靈修而隕志兮，吟澤畔之江濱。  
椒桂羅以顛覆兮，有竭信而歸誠。  
讒夫藹藹而漫著兮，曷其不舒予情？  
始結言於廟堂兮，信中塗而叛之。  
懷蘭蕙與衡芷兮，行中壅而散之。  
聲哀哀而懷高丘兮，心愁愁而思舊邦。  
願承閒而自恃兮，徑淫暄而道癡。  
顏黢黢以沮敗兮，精越裂而衰耄。  
裳澹澹而含風兮，衣納納而掩露。  
赴江湘之湍流兮，順波湊而下降。  
徐徘徊於山阿兮，飄風來之洶洶。

馳余車兮玄石，步余馬兮洞庭。

平明發兮蒼梧，夕投宿兮石城。

芙蓉蓋而菱華車兮，紫貝闕而玉堂。

薜荔飾而陸離薦兮，魚鱗衣而白霓裳。

登逢龍而下隕兮，違故鄉之漫漫。

思南郢之舊俗兮，腸一夕而九迴。

揚流波之潢潢兮，體溶溶而東回。

心怊悵以永思兮，意晦晦而日頹。

白露紛以塗塗兮，秋風瀏以蕭蕭。

身永流而不還兮，覓長逝而常愁。

歎曰：

譬彼流水紛揚礚兮，波逢洶涌瀆滂沛兮，揄揚滌盪流隕往觸峯石兮，龍印罽圈繚戾宛轉阻相薄兮，遭紛逢凶蹇離尤兮，垂文揚采遺將來兮。

## 離世

靈懷其不吾知兮，靈懷其不吾聞。

就靈懷之皇祖兮，愬靈懷之鬼神。

靈懷曾不吾與兮，即聽夫人之諛辭。

余辭上參於天墜兮，旁引之於四時。

指日月使延照兮，撫招搖以質正。

立師曠俾端辭兮，命咎繇使並聽。

兆出名曰正則兮，卦發字曰靈均。

余幼既有此鴻節兮，長愈固而彌純。

不從容而諛行兮，直躬指而信志。  
不枉繩以追曲兮，屈情素以從事。  
端余行其如玉兮，述皇輿之踵跡。  
群阿容以晦光兮，皇輿覆以幽辟。  
輿中塗以回畔兮，駟馬驚而橫犇。  
執組者不能制兮，必折軛而摧轅。  
斷鑣銜已馳驚兮，暮去次而敢止。  
路蕩蕩其無人兮，遂不禦乎千里。  
身衡陷而下沈兮，不可獲而復登。  
不顧身之卑賤兮，惜皇輿之不興。  
出國門而端指兮，冀壹寤而錫還。  
哀僕夫之坎毒兮，屢離憂而逢患。  
九年之中不吾反兮，思彭咸之水游。  
惜師延之浮渚兮，赴汨羅之長流。  
遵江曲之逶移兮，觸石碣而衡游。  
波澧澧而揚澆兮，順長瀨之濁流。  
凌黃沔而下低兮，思還流而復反。  
玄輿馳而並集兮，身容與而日遠。  
權舟杭以橫瀛兮，滄湘流而南極。  
立江界而長吟兮，愁哀哀而累息。  
情慌忽以忘歸兮，神浮游以高厲。  
心蜚蛩而懷顧兮，魂眷眷而獨逝。  
歎曰：

余思舊邦心依違兮，日暮黃昏羌幽悲兮，去郢東遷余誰慕兮，讒夫黨旅其以茲故兮，河水淫淫情所願兮，顧瞻郢路終不返兮。

### 怨思

惟鬱鬱之憂毒兮，志坎壈而不違。  
身憔悴而考旦兮，日黃昏而長悲。  
閔空宇之孤子兮，哀枯楊之冤鷄。  
孤雌吟於高墉兮，鳴鳩棲於桑榆。  
玄蟻失於潛林兮，獨偏棄而遠放。  
征夫勞於周行兮，處婦憤而長望。  
申誠信而罔違兮，情素潔於紐帛。  
光明齊於日月兮，文采耀於玉石。  
傷壓次而不發兮，思沈抑而不揚。  
芳懿懿而終敗兮，名靡散而不彰。

背玉門以犇驚兮，蹇離尤而干詬。  
若龍逢之沈首兮，王子比干之逢醢。  
念社稷之幾危兮，反為讐而見怨。  
思國家之離沮兮，躬獲愆而結難。  
若青蠅之偽質兮，晉驪姬之反情。  
恐登階之逢殆兮，故退伏於末庭。  
孽臣之號咷兮，本朝蕪而不治。  
犯顏色而觸諫兮，反蒙辜而被疑。

菀靡蕪與菌若兮，漸藁本於洿瀆。  
淹芳芷於腐井兮，棄雞駭於筐簏。  
執棠谿以荆蓬兮，秉干將以割肉。  
筐澤瀉以豹鞞兮，破荆和以繼築。  
時溷濁猶未清兮，世殺亂猶未察。  
欲容與以俟時兮，懼年歲之既晏。  
顧屈節以從流兮，心鞏鞏而不夷。  
寧浮沅而馳騁兮，下江湘以遭迴。

歎曰：

山中檻檻余傷懷兮，征夫皇皇其孰依兮，經營原野杳冥冥兮，乘騏驎舒吾情兮，歸骸舊邦莫誰語兮，長辭遠逝乘湘去兮。

### 遠逝

志隱隱而鬱怫兮，愁獨哀而冤結。  
腸紛紜以繚轉兮，涕漸漸其若屑。  
情慨慨而長懷兮，信上皇而質正。  
合五嶽與八靈兮，訊九軀與六神。  
指列宿以白情兮，訴五帝以置辭。  
北斗為我折中兮，太一為余聽之。  
云服陰陽之正道兮，御后土之中和。  
佩蒼龍之蚺虬兮，帶隱虹之透蛇。  
曳彗星之皓旰兮，撫朱爵與駿驂。  
游清靈之颯戾兮，服雲衣之披披。



杖玉華與朱旗兮，垂明月之玄珠。  
舉霓旌之帶翳兮，建黃纁之總旒。  
躬純粹而罔愆兮，承皇考之妙儀。  
惜往事之不合兮，橫汨羅而下瀾。  
棄隆波而南渡兮，逐湘江之順流。  
赴陽侯之潢洋兮，下石瀨而登洲。  
陸魁堆以蔽視兮，雲冥冥而闇前。  
山峻高以無垠兮，遂曾閔而迫身。  
雪雰雰而薄木兮，雲霏霏而隕集。  
阜隘狹而幽險兮，石參嵯以翳日。  
悲故鄉而發忿兮，去余邦之彌久。  
背龍門而入河兮，登大墳而望夏首。  
橫舟航而滄湘兮，耳聊啾而儻恍。  
波淫淫而周流兮，鴻溶溢而滔蕩。  
路曼曼其無端兮，周容容而無識。  
引日月以指極兮，少須臾而釋思。  
水波遠以冥冥兮，眇不睹其東西。  
順風波以南北兮，霧宵晦以紛紛。  
日杳杳以西頽兮，路長遠而窘迫。  
欲酌醴以娛憂兮，蹇騷騷而不釋。

歎曰：

飄風蓬龍埃拂拂兮，艸木搖落時槁悴兮，遭傾遇禍不可救兮，長吟永歎涕究究兮，舒情訴詩冀以自免兮，頽流下隕身日遠兮。

## 借賢

覽屈氏之離騷兮，心哀哀而怫鬱。  
聲嗷嗷以寂寥兮，顧僕夫之憔悴。  
撥諂諛而匡邪兮，切澠忍之流俗。  
盪浪淩之姦咎兮，夷蠹蠹之溷濁。  
懷芬香而挾蕙兮，佩江離之萋萋。  
握申椒與杜若兮，冠浮雲之峨峨。  
登長陵而四望兮，覽芷圃之蠹蠹。  
游蘭皋與蕙林兮，睨玉石之嵯嵯。  
揚精華以眩耀兮，芳鬱渥而純美。  
結桂樹之旖旎兮，紉荃蕙與辛夷。  
芳若茲而不御兮，捐林薄而苑死。  
驅子僑之犇走兮，申徒狄之赴淵。  
若由夷之純美兮，介子推之隱山。  
晉申生之離殃兮，荊和氏之泣血。  
吳申胥之抉眼兮，王子比干之橫廢。  
欲卑身而下體兮，心隱惻而不置。  
方圜殊而不合兮，鉤繩用而異態。  
欲俟時於須臾兮，日陰暝其將暮。  
時遲遲其日進兮，年忽忽而日度。  
妄周容而入世兮，內距閉而不開。  
俟時風之清激兮，愈氛霧其如塵。

進雄鳩之耿耿兮，讒介介而蔽之。  
默順風以偃仰兮，尚由由而進之。  
心憤恨以冤結兮，情舛錯以曼憂。  
攀薜荔於山野兮，采撚支於中洲。  
望高丘而歎涕兮，悲吸吸而長懷。  
孰契契而委棟兮，日晡晡而下頹。

歎曰：

江湘油油長流汨兮，挑揄揚汰盪迅疾兮，憂心展轉愁怫鬱兮，冤結未舒長隱忿兮，丁時逢殃可奈何兮，勞心悵悵涕滂沱兮。

### 憂苦

悲余心之悵悵兮，哀故邦之逢殃。  
辭九年而不復兮，獨煢煢而南行。  
思余俗之流風兮，心紛錯而不受。  
遵壑莽以呼風兮，步從容於山廋。  
巡陸夷之曲衍兮，幽空虛以寂寞。  
倚石巖以流涕兮，憂憔悴而無樂。  
登巘岼以長企兮，望南郢而闐之。  
山修遠其遼遼兮，塗漫漫其無時。  
聽玄鶴之晨鳴兮，于高岡之峨峨。  
獨憤積而哀娛兮，翔江洲而安歌。  
三鳥飛以自南兮，覽其志而欲北。  
願寄言於三鳥兮，去飄疾而不可得。

欲遷志而改操兮，心紛結其未離。  
外彷徨而游覽兮，內惻隱而含哀。  
聊須臾以時忘兮，心漸漸其煩錯。  
願假簧以舒憂兮，志紆鬱其難釋。  
歎離騷以揚意兮，猶未殫於九章。  
長噓吸以於悒兮，涕橫集而成行。  
傷明珠之赴泥兮，魚眼璣之堅藏。  
同鴛鴦與琴瑟兮，雜斑駁與蘭茸。  
葛藟藟於桂樹兮，鳴鴉集於木蘭。  
偃促談於廊廟兮，律魁放乎山間。  
惡虞氏之簫韶兮，好遺風之激楚。  
潛周鼎於江淮兮，爨土鬻於中宇。  
且人心之持舊兮，而不可保長。  
遭彼南道兮，征夫宵行。  
思念郢路兮，還顧睠睠。  
涕流交集兮，泣下漣漣。

嘆曰：

登山長望中心悲兮，  
苑彼青青泣如頽兮，  
畱思北顧涕漸漸兮，  
折銳摧矜凝汜濫兮，  
念我瑩瑩覓誰求兮，  
僕夫慌悴散若流兮。

## 愍命

昔皇考之嘉志兮，喜登能而亮賢。  
情純潔而罔蕨兮，姿盛質而無愆。  
放佞人與諂諛兮，斥讒夫與便嬖。  
親忠正之惓誠兮，招貞良與明智。  
心溶溶其不可量兮，情澹澹其若淵。  
回邪辟而不能入兮，誠願藏而不可遷。  
逐下秩於後堂兮，迎處妃於伊雒。  
荆讒賊於中厠兮，選呂管於榛薄。  
叢林之下無怨士兮，江河之畔無隱夫。  
三苗之徒以放逐兮，伊臯之倫以充廬。  
今反表以為裏兮，顛裳以為衣。  
戚宋萬於兩楹兮，廢周邵於遐夷。  
卻騏驥以轉運兮，騰驢羸以馳逐。  
蔡女黜而出帷兮，戎婦入而綵繡服。  
慶忌囚於阱室兮，陳不占戰而赴圍。  
破伯牙之號鍾兮，挾人箏而彈緯。  
藏璿石於金匱兮，捐赤瑾於中庭。  
韓信蒙於介冑兮，行夫將而攻城。  
莞芎棄於澤洲兮，爬蠶蠹於筐篋。  
麒麟奔於九臯兮，熊羆羣而逸囿。  
折芳枝與瓊華兮，樹枳棘與薪柴。

掘荃蕙與射干兮，耘藜藿與蕺荷。  
惜今世其何殊兮，遠近思而不同。  
或沈淪其無所達兮，或清激其無所通。  
哀余生之不當兮，獨蒙毒而逢尤。  
雖謗譽以申志兮，君乖差而屏之。  
誠惜芳之菲菲兮，反以茲為腐也。  
懷椒聊之諛諛兮，乃逢紛以罹詬也。

歎曰：

嘉皇既歿終不返兮，  
山中幽險郢路遠兮，  
讒人譏諷孰可愬兮，  
征夫罔極誰可語兮？  
行吟累歎聲喟喟兮，  
懷憂含戚何佗僚兮。

### 思古

冥冥深林兮，樹木鬱鬱。  
山參差以嶄巖兮，阜杳杳以蔽日。  
悲余心之悵悵兮，目眇眇而遺泣。  
風騷屑以搖木兮，雲吸吸以湫戾。  
悲余生之無歡兮，愁倥偬於山陸。  
旦徘徊於長阪兮，夕彷徨而獨宿。  
髮披披以鬢鬢兮，躬劬勞而瘖悴。

覓徃徃而南行兮，泣露襟而濡袂。  
心嬋媛而無告兮，口噤閉而不言。  
違郢都之舊閭兮，回湘沅而遠遷。  
念余邦之橫陷兮，宗鬼神之無次。  
閔先嗣之中絕兮，心惶惑而自悲。  
聊浮游於山陬兮，步周流於江畔。  
臨深水而長嘯兮，且倘佯而汎觀。  
興離騷之微文兮，冀靈修之壹悟。  
還余車於南郢兮，復往軌於初古。  
道修遠其難遷兮，傷余心之不能已。  
背三五之典刑兮，絕洪範之辟紀。  
播規槩以背度兮，錯權衡而任意。  
操繩墨而放棄兮，傾容幸而侍側。  
甘棠枯於豐草兮，藜棘樹於中庭。  
西施斥於北宮兮，佗侏倚於彌楹。  
烏獲戚而驂乘兮，燕公操於馬圉。  
崩躡登於清府兮，咎繇棄而在壑。  
蓋見茲以永歎兮，欲登階而狐疑。  
槩白水而高驚兮，因徙弛而長辭。

歎曰：

倘伴墟阪沼水深兮，容與漢渚涕淫淫兮，  
鍾牙已死誰為聲兮，織阿不御焉舒情兮，  
曾哀悽欷心離離兮，  
還顧高丘泣如灑兮。

## 遠遊

悲余性之不可改兮，屢懲艾而不彀。  
服覺皓以殊俗兮，貌揭揭以巍巍。  
譬若王僑之乘雲兮，載赤霄而凌太清。  
欲與天地參壽兮，與日月而比榮。  
登崑崙而北首兮，悉靈囿而來謁。  
選鬼神於太陰兮，登閭闔於玄闕。  
回朕車俾西引兮，褰虹旗於玉門。  
馳六龍於三危兮，朝西靈於九濱。  
結余軫於西山兮，橫飛谷以南征。  
絕都廣以直指兮，歷祝融於朱冥。  
枉玉衡於炎火兮，委兩館於咸唐。  
貫瀕濛以東竭兮，維六龍於扶桑。  
周流覽於四海兮，志升降以高馳。  
徵九神於回極兮，建虹采以招指。  
駕鸞鳳以上遊兮，從玄鶴與鷦明。  
孔鳥飛而送迎兮，騰群鶴於瑤光。  
排帝宮與羅囿兮，升縣圃以眩滅。  
結瓊枝以雜佩兮，立長庚以繼日。  
凌驚竄以軼駭電兮，綴鬼谷於北辰。  
鞭風伯使先驅兮，囚靈玄於虞淵。  
溯高風以低徊兮，覽周流於朔方。  
就顛頊而陳辭兮，考玄冥於空桑。



旋車逝於崇山兮，奏虞舜於蒼梧。  
滄楊舟於會稽兮，就申胥於五湖。  
見南郢之流風兮，殞余躬於沅湘。  
望舊邦之黯黹兮，時溷濁其猶未央。  
懷蘭茝之芬芳兮，妬被離而折之。  
張絳帷以澹澹兮，風邑邑而蔽之。  
日暎暎其西舍兮，陽焱焱而復顧。  
聊假日以須臾兮，何騷騷而自故。

歎曰：

譬彼蛟龍乘雲浮兮，汎淫瀕溶紛若霧兮，潺湲轆轤雷動電發馭高舉兮，升虛凌冥沛濁浮清入帝宮兮，  
搖翹奮羽馳風騁兩游無窮兮。

## 卷十七 九思

### 逢尤

悲兮愁，哀兮憂，天生我兮當閭時。  
被詿譖兮虛獲尤。  
心煩憤兮意無聊。  
嚴載駕兮出戲游。  
周八極兮歷九州。  
求軒轅兮索重華。  
世既卓兮遠眇眇，握佩玖兮中路躇。  
羨咎繇兮建典謨，懿風后兮受瑞圖。

愍余命兮遭六極，委玉質兮於泥塗。  
遽倥偬兮驅林澤，步屏營兮行丘阿。  
車軌折兮馬虺頽，愆悵立兮涕滂沱。  
思丁文兮聖明哲，哀平差兮迷謬愚。  
呂傅舉兮殷周興，忌嚚專兮郢吳虛。  
仰長歎兮氣餉結，悒殞絕兮咥復蘇。  
虎兕爭兮於廷中，豺狼鬪兮我之隅。  
雲霧會兮日冥晦，飄風起兮揚塵埃。  
走鬯罔兮乍東西，欲竄伏兮其焉如？  
念靈閨兮隩重深，願竭節兮隔無由。  
望舊邦兮路逶隨，憂心悄兮志勤劬。  
魂瑩瑩兮不遑寐，目眈眈兮寤終朝。

### 怨上

令尹兮警警，群司兮濃濃。  
哀哉兮涸涸，上下兮同流。  
菽藟兮蔓衍，芳薺兮挫枯。  
朱紫兮雜亂，曾莫兮別諸。  
倚此兮巖穴，永思兮窈悠。  
嗟懷兮眩惑，用志兮不昭。  
將喪兮玉斗，遺失兮鈕樞。  
我心兮煎熬，惟是兮用憂。  
進惡兮九旬，復顧兮彭務。

擬斯兮二蹤，未知兮所投。  
謠吟兮中壑，上察兮璇璣。  
大火兮西睨，攝提兮運低。  
雷霆兮硠磕，雹霰兮霏霏。  
奔電兮光晃，涼風兮愴悽。  
鳥獸兮驚駭，相從兮宿棲。  
鴛鴦兮嚙噬，狐狸兮微微。  
哀吾兮介特，獨處兮罔依。  
螻蛄兮鳴東，蝨蠹兮號西。  
載緣兮我裳，蠋入兮我懷。  
蟲豸兮夾余，惆悵兮自悲。  
佇立兮怛怛，心結縉兮折摧。

### 疾世

周徘徊兮漢渚，求水神兮靈女。  
嗟此國兮無良，媒女詘兮譴謗。  
鵙雀列兮譁譁，鳩鴿鳴兮聒余。  
抱昭華兮寶璋，欲銜鬻兮莫取。  
言旋邁兮北徂，叫我友兮配耦。  
日陰曠兮未光，闐眇窳兮靡睹。  
紛載驅兮高馳，將諮詢兮皇羲。  
遵河臯兮周流，路變易兮時乖。  
瀟滄海兮東游，沐盥浴兮天池。

訪太昊兮道要，云靡貴兮仁義。  
志欣樂兮反征，就周文兮邠歧。  
秉玉英兮結誓，日欲暮兮心悲。  
惟天祿兮不再，背我信兮自違。  
踰隴堆兮渡漠，過桂車兮合黎。  
赴崑山兮暈驟，從叩漱兮棲遲。  
吮玉液兮止渴，齧芝華兮療饑。  
居嶮廓兮眇疇，遠梁昌兮幾迷。  
望江漢兮濩諾，心緊綦兮傷懷。  
時咄咄兮旦旦，塵莫莫兮未晞。  
憂不暇兮寢食，吒增歎兮如雷。

## 憫上

哀世兮睽睽，譏諷兮嗾喔。  
眾多兮阿媚，耽靡兮成俗。  
貪枉兮黨比，貞良兮斃獨。  
鵠竄兮枳棘，鵝集兮帷幄。  
蘭蕙兮青蔥，藁本兮萎落。  
覩斯兮偽惑，心為兮隔錯。  
逡巡兮圍藪，率彼兮畛陌。  
川谷兮淵淵，山崑兮峒峒。  
叢林兮崑崙，株榛兮岳岳。  
霜雪兮漼漼，冰凍兮洛澤。

東西兮南北，罔所兮歸薄。

庇蔭兮枯樹，匍匐兮巖石。

蹉跎兮寒局數。

獨處兮志不申，年齒盡兮命迫促，魁壘擠摧兮常困辱。

含憂強老兮愁不樂。

鬚髮薺頰兮顛鬢白，思靈澤兮一膏沐。

懷蘭英兮把瓊若，待天明兮立躑躅。

雲蒙蒙兮電僚爍，孤雌驚兮鳴啣啣。

思怫鬱兮肝切剝，忿悁悒兮孰訴告。

## 遭厄

悼屈子兮遭厄，沈王躬兮湘汨。

何楚國兮難化，迄于今兮不易。

士莫志兮羔裘，競佞諛兮讒閱。

指正義兮為曲，訛玉璧兮為石。

鴉鵙游兮華屋，駿驥棲兮柴蔟。

起奮迅兮奔走，違羣小兮謏詬。

載青雲兮上昇，適昭明兮所處。

躡天衢兮長驅，踵九陽兮戲蕩。

越雲漢兮南濟，秣余馬兮河鼓。

雲霓紛兮晦翳，參辰回兮顛倒。

逢流星兮問路，顧我指兮從左。

徑俶背兮直馳，御者迷兮失軌。

遂踴達兮邪造，與日月兮殊道。  
志闕絕兮安如，哀所求兮不耦。  
攀天階兮下視，見鄢郢兮舊宇。  
意逍遙兮欲歸，眾穢盛兮杳杳。  
思哽澁兮詰詘，涕流瀾兮如雨。

### 悼亂

嗟嗟兮悲夫，殺亂兮紛拏。  
茅絲兮同綜，冠履兮共絢。  
督萬兮侍宴，周邵兮負芻。  
白龍兮見射，靈龜兮執拘。  
仲尼兮困厄，鄒衍兮幽囚。  
伊余兮念茲，奔遁兮隱居。  
將升兮高山，上有兮猴猿。  
欲入兮深谷，下有兮虺蛇。  
左見兮鳴鴟，右睹兮呼梟。  
惶悸兮失氣，踴躍兮距跳。  
便旋兮中原，仰天兮增歎。  
菅蒯兮壅莽，藿葦兮仟眠。  
鹿蹊兮躑躅，獾貉兮蟬蟬。  
鷓鴣兮軒軒，鶉鷄兮甄甄。  
哀我兮寡獨，靡有兮齊倫。  
意欲兮沈吟，迫日兮黃昏。

玄鶴兮高飛，曾逝兮青冥。  
鷓鴣兮啾啾，山鵲兮嚶嚶。  
鴻鷗兮振翅，歸鴈兮于征。  
吾志兮覺悟，懷我兮聖京。  
垂屣兮將起，跼蹐兮碩明。

### 傷時

惟昊天兮昭靈，陽氣發兮清明。  
風習習兮和煖，百草萌兮華榮。  
堇荼茂兮扶疏，蘅芷彫兮瑩嫻。  
愍貞良兮遇害，將夭折兮碎糜。  
時混混兮澆鑽，哀當世兮莫知。  
覽往昔兮俊彥，亦詘辱兮係纍。  
管束縛兮桎梏，百貿易兮傳賣。  
遭桓繆兮識舉，才德用兮列施。  
且從容兮自慰，玩琴書兮遊戲。  
迫中國兮迓陬，吾欲之兮九夷。  
超五嶺兮嵯峨，觀浮石兮崔嵬。  
陟丹山兮炎野，屯余車兮黃支。  
就祝融兮稽疑，嘉已行兮無為。  
乃回謁兮北逝，遇神嬭兮宴娛。  
欲靜居兮自娛，心愁感兮不能。  
放余轡兮策駟，忽飄騰兮浮雲。

蹶飛杭兮越海，從安期兮蓬萊。  
緣天梯兮北上，登太一兮玉臺。  
使素女兮鼓簧，乘弋和兮謳謠。  
聲噉詭兮清和，音晏衍兮要姪。  
咸欣欣兮酣樂，余眷眷兮獨悲。  
顧章華兮太息，志戀戀兮依依。

### 哀歲

旻天兮清涼，玄氣兮高朗。  
北風兮潦冽，草木兮蒼唐。  
蚺蚺兮噍噍，蛆蛆兮穰穰。  
歲忽忽兮惟暮，余感時兮悽愴。  
傷俗兮泥濁，矇蔽兮不章。  
寶彼兮沙礫，捐此兮夜光。  
椒瑛兮湟汙，藁耳兮充房。  
攝衣兮緩帶，操我兮墨陽。  
昇車兮命僕，將馳兮四荒。  
下堂兮見蠹，出門兮觸塗。  
巷有兮蚰蜒，邑多兮螳螂。  
睹斯兮嫉賊，心為兮切傷。  
俛念兮子胥，仰憐兮比干。  
投劍兮脫冕，龍屈兮蜿蟺。  
潛藏兮山澤，匍匐兮叢攢。



窺見兮溪澗，流水兮云云。  
龍龜兮欣欣，鱣鮪兮延延。  
群行兮上下，駢羅兮列陳。  
自恨兮無友，特處兮茕茕。  
冬夜兮陶陶，雨雪兮冥冥，神光兮頽頽，鬼火兮熒熒。  
修德兮困控，愁不聊兮遑生，憂紆兮鬱鬱，惡所兮寫情。

### 守志

陟玉巒兮逍遙，覽高岡兮嶢嶢。  
桂樹列兮紛敷，吐紫華兮布條。  
實孔鸞兮所居，今其集兮惟鴉。  
烏鵲驚兮啞啞，余顧兮怊怊。  
彼日月兮闇昧，障覆天兮稜氛。  
伊我后兮不聰，焉陳誠兮效忠。  
攄羽翮兮超俗，游陶遨兮養神。  
乘六蛟兮蜿蟺，遂馳騁兮陞雲。  
揚慧光兮為旗，秉電策兮為鞭。  
朝晨發兮鄢郢，食時至兮增泉。  
繞曲阿兮北次，造我車兮南端。  
謁玄黃兮納贄，崇忠貞兮彌堅。  
歷九宮兮徧觀，睹祕藏兮寶珍。  
就傳說兮騎龍，與織女兮合婚。  
舉天羣兮掩邪，殼天弧兮射姦。

隨真人兮翱翔，食元氣兮長存。  
望太微兮穆穆，睨三階兮炳分。  
相輔政兮成化，建烈業兮垂勳。  
日警警兮西沒，道遐迴兮阻歎。  
志稽積兮未通，悵敞罔兮自憐。

亂曰：

天庭明兮雲霓藏，三光朗兮鏡萬方。  
斥蜥蜴兮進龜龍，策謀從兮翼機衡。  
配稷契兮恢唐功，嗟英俊兮未為雙。